

IRA MARICOS ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

*Ipocasique Joan, ibaotisantagueque.
(Mt 3.1-12; Ir 3.1-18; Jn 1.19-28)*

¹ Yamai nongomantëgotëri Jesoquirisito. Iriro Agabisaicoontatsiri, Itomi Tosorintsi. Iroonti Caninaro Nibarintsi ora nongomantëmi.

² Jirai isanguenaque comantantatsiri jítacha Isaías:

Icanë Tosorintsi: “Notomi, nagáqueri nomeraro irobaquemi irobetsicoboguitëmiro pabo. Ingantaiguëri matsiguenga: ‘Pigamaiguemari págacaninatobëri Ira Agabisaicoontatsiri, pinguemisantiri’.

³ Inguenguitsatacagaiguëriini matsiguenga canta tenta ontimingani, ingomantëgotëmi: ‘Coraque Atingomi. Piganinatio paneingomento pibega cara pobetsicoboguitineri irabo itingomisonori pigatingatiro’ ”.

⁴ Aroque omoncaraca ora icanque Tosorintsi, aisati ora isanguenaque Isaías jirai. Iconijapë Joan baotisantantatsiri canta tenta ontimingani. Icomantaigapëri imatsiguenga, ibaotisatiguëri. Iquenguitsatacagaiguëri:

—Pingantaigaima yacaquerocha, pijocajiro ora picantaguetabeca te onganinate, pomasiniatitaje,

quero picantaja pibega jirai. Pomaotisatima. Aro irojocajimiro Tosorintsi ora picantaguëti te onganinate, iromaguisanquero, quero iguisaneintajimi. Aisati irogóiguë matsiguenga cara icábintsëmi Tosorintsi.

⁵ Aro iátasitaiguëri Joan tojai matsiguenga, Joreasati aisati Jerosaresati, iquemisantaiguëri. Icomantaigapë:

—Aiti nacantaguëti ora te onganinate. Nocoguini ingábintsena Tosorintsi iragabisaicotajina.

Aique ibaotisataigabaqueri Joan cara nijaaquë jitacha Jorirán.

⁶ Ora iguitsagare Joan irianti cameyopiti, imatsaguitari imasitsa. Irianti yaagui ira tsiguëriquipague. Aisati itsimi pitsia.

⁷ Icomantaiguëri imatsiguenga:

—Aique iribocapë sërari te aisa ingantina nibeganaro. Ibaquina Irironta Natingomisonori, nitsoingaa naati naronta cantaca iromeraro Iriro.

⁸ Naro baotisatantaiguëmiro nija. Irari bocapënguïtsine aiquenta irogopëmiro Caninaro Isëre Tosorintsi inasërequimi cara pinguemisantobëri.

Ibaotisataca Jesus.

(Mt 3.13-17; Ir 3.21-22; Jn 1.31-34)

⁹ Cara yarepa Jesus. Ipaniapa poeboroquë jitacha Nasaret cara Garireaquë, iátasipëri Joan. Ibaotisatobëri Joriránque.

¹⁰ Cara icontiatanai Jesus nijaaquë, aito cara iniobero pasirianaca Jonogaguëti pamasobingopëri Caninaro Isëre Tosorintsi ocampari sompaguëti.

¹¹ Aisati oquemobëngani Irinibare Tosorintsi jonoquë icanquë:

—Obiro Notomi, nanintasanotanë. Tojai nacan-inabentasanotëmi.

Icogabeca camagari irantacaquerime Jesus ora te onganinate.

(Mt 4.1-11; Ir 4.1-13)

¹² Aique ora Isëre Tosorintsi páganëri Jesus cara tera ontimingani.

¹³ Cara, itimaque 40 cataguiteri. Ipocasipëri Satanás icogabeca irantacaguirime Jesus ora te onganinate carari te ingantiro. Aisati ainta cobeingaripague, te iratsiquiri. Aique ipocasitaiguëri ironomirepague Tosorintsi imitocotaigapëri Ira Jesus.

Iparintaca iquenguitsaque Jesus.

(Mt 4.12-17; Ir 3.18-20; 4.14-15)

¹⁴ Cara yomianquengani Joan, aique iáque Jesus Garireaquë. Iquenguitsapëro Caninaro Irinibare Tosorintsi.

¹⁵ Icanque:

—Aroque omoncaraguitepa. Pënibaque ore-quima iragáantane Tosorintsi cara intingomibintaiguëmi. Pingantaigaima yacaqueroca, pijocajiro ora picantaguetira te onganinate, pinguemisantiro ora Caninaro Nibarintsi.

Cara icoigaiguëri irogomere Jesus.

(Mt 4.18-22; Ir 5.1-11; Jn 1.35-51)

¹⁶ Cara ipanomiatanëro Jesus cara onamijaquë angaare jítacha Garirea, iniopëri Simón aisati ireinti, Antiris. Isiriataigasegui simaguitinta ini.

¹⁷ Icampëri Jesus:

—Intsome, piguiatanëna. Jirai pitarobacaati pisiriataiguëri sima carari yamaica nomëmiro iro-rai pitarobacaare; pinguemisantacaguinari matsiguenga.

¹⁸ Aito cara ijocanëro isiritite, yoguiataiganaqueri.

¹⁹ Yogagaiganaca canta queronta cara iniopëri Jesus pite basini, Santiago aisati ireinti jitacha Joan. Iriro pitirooti itomi Sebereo. Yobetsicaigaseguero irisirimento cara pitotsiquë.

²⁰ Aisati icaimaigapëri Jesus. Aito cara ijocaiganaqueri Sebereo aisati iromeraro cara ibitoquë yoguiataiganaqueri.

Icanaque Jesus cara yapatotaiga jorío.

(Ir 4.31-37)

²¹ Aro yaretaigacaro poeboro jitacha Caperinao. Cara cataguitariquë comagoriantague, iroonti sábaro, icanaque Jesus pongotsiquë cara yapatotaiga joríojegui, yogometaigapëri matsiguenga.

²² Iquemaigabaqueri iquenganeintasantaiganaca yogometaiguërinta aisa icantari ibega itingomi ogótasantatsiri; Ira Jesus cagari aisa icanta ira ogomeantiro isanguenare Moisés.

²³ Cara yapatotaiga jorío, ainta inasegui sërari inancari camagari. Catsigue icaimasantëri Ira Jesus:

²⁴ —¡Ongainta! Quero picantaiguina, Jesus Nasaresati. ¿Naroco pipocasique yamai pitsipiriacagaiguëna? Nigóquimi Obiro, Ira Caninari Itomi Tosorintsi.

²⁵ Isintsitsaqueri Jesus ira camagari, icanqueri:

—Pomairete. Pijátopitiri ica sërarica.

²⁶ Aro ira camagari yoguimogomogoatanëri, icaimanë catsiguesonori iátopitëri.

²⁷ Iniaiguëri joríojegui, iquenganeintasanoiganaca, inibatobaca icantaiguë:

—¿Pairo ojita oca? Iroonti iroraisonori ogomeantagantsi. Ica patiro inibatëri ira camagari, aito cara iquemisanqueri iátaji. Tojai itingomintasanti.

²⁸ Aique omanapague iquemocotaiguëri Jesus omagaro Garireasati aisati antagaisati ira timaigatsi jaquerora.

Jesos yogaguibegajiro iraguiro Peroro.

(Mt 8.14-15; Ir 4.38-39)

²⁹ Cara isotocaiganaji Jesus aisati irogomere cara pongotsiquë cara yapatotaiga jorío, icaiganaque ibangoquë Simón aisati irasi Antiris. Itsibatanacari Santiago aisati Joan.

³⁰ Ainta ojanaisigui iraguiro Simón, pinariasega osamamentoquë. Icomantëgotëro, icomantaigabaqueri Jesus:

—Ocatsiringaeguisigui iraguiro Simón. Pigaguibegajiro.

³¹ Aro yotsitiparo Jesus, yágobagotëro, yogaratingopëro. Aito cara pabisanajiro ogatsingaeguire, pibeganaa, opaguetaiguëri iraperi.

Cara sábaroquë yogaguibegajiri tojai janaitague-tatsiri.

(Mt 8.16-17; Ir 4.40-41)

³² Cara ochapinitanë, icanaque paba, yamaguepëneri tojai janaitague-tatsiri cara Jesusiquë, aisati ira inantagueca camagari.

33 Pënibaque omagaro Caperinaosati yapatotaigaca cara omoroquë ibango Simón cara inasegui Jesus.

34 Tojai yogaguibegaguetajiri ira janaitague-tatsi. Aisati igátaiguëri tojai camagari yomisotocajiri, te iranintacaguiri camagari irinibatocotiri igótirinta.

Iquenguitsatagueque Jesus Garireaquë.

(Mt 4.23; Ir 4.42-44)

35 Oquëtaguetanë icabiritamananaca Jesus tsi-tiniqueraí. Iáque paniro cara tera ontimingani yamanocopëri Iriri.

36 Aique icabiritanaca irogomere icogaigabitacari Simón aisati itsipa, iáiganaque,

37 iniaigairi, icanqueri:

—Icogaiguimini antagaisati matsiguenga.

38 Yotabitanëri Jesus:

—Intsome basinipaguequë poeboro aronisati. Naninti nongomantagueiguëri aisati iroronta nipocasique.

39 Aro iátagueque iquenguitsatomotaguequeri matsiguenga cara yapatotaiga jorío yotsatengaguetanëro omagaro poeboropague cara Garireaquë. Aisati ijocaigaineri matsiguenga igamagarite.

Jesus yogaguibegajiri iribatsasetaga.

(Mt 8.1-4; Ir 5.12-16)

40 Aro ainta iribatsasetaga iátasiqueri Jesus yobaticagueritotasipari yamanopëri icanque:

—Pinintica, piguëtetainaro nobatsagoro, pigaguibegajina.

⁴¹ Aro icantaneintëgotanëri Jesus itimagonaguitanaca ibaco, yotsagaqueri icanqueri:

—Nocogui yamai; nagabisaicotajimi.

⁴² Aito cara opeganaa ora iribatsagoro, iquëtetanai.

⁴³⁻⁴⁴ Aro igáqueri Jesus:

—Quero pairi picomantëmati. Pijáte saserirotiquë, poniaguimari irogóontëmi cara aroque pabisëgotai. Pingantiro ora icanque Moisés: páganëneri saseriroti pobira, iritaguineri Tosorintsi. Aro irogótocotaiguëmi matsiguenga aroque pabisëgotai piquëtetanai.

⁴⁵ Carari aiqero piátanëtigue cara icomantëgotëri Jesus. Ipocasitaiguërinta tojaisonori matsiguenga yoticaiguëri Ira Jesus arota quero iqui poeboroquë, caraanti inai cara tera ontimingani. Përosati ipocasitaiguëri matsiguenga ira paniaguitacha poeboropaguequë jaanta.

2

Yogaguibegajiri emëngari Jesus.

(Mt 9.1-8; Ir 5.17-26)

¹ Aiquenta ipiganaja Jesus cara Caperinaoquë. Aro iquemocotobairi cara ainta pongotsiquë.

² Aro yapatobiritaigacari tojaisonori matsiguenga, iaguicaro pongotsi. Aisati sotoquë ishapiicaro omoro arota quero iqui basini. Jesus icomantaguequeri matsiguenga icomantëgotëro Irinibare Tosorintsi

³ cara yaretaigapa itsibasati sërari yanato-coigapëri sërari emëngari, ira te iranëibintsate.

⁴ Icogaigabitaca iráganëri tsomagui cara inasegui Jesus carari tiguëti inguenaque cara

ingaaganëri iacaronta pongotsi matsiguenga. Aro itaganëri jonoquë pongotsi yomoroganëro yoguëantaigacari jatasintsi aisati sogatsa catingasatiquë Jesus.

⁵ Jesus igótaiguëri cara iquemisantaiguëri yogu-iaqueri cara iroguibegajiri ira emëngari, icabëri:

—Yamai nomatsiguenga, nojocajimiro ora picantagueti te onganinate; quero iguisëgotaimiro Tosorintsi, quero iquengaimiro.

⁶ Ainta isobicaigasegui irapague ogomeantiro isanguenare Moisés, iquenganeintaca iriatiegui:

⁷ “¿Pairo icantobique negaca ica sërarica? Icantocotaguetasitari Tosorintsi. Quero pairi jocaguetirone ora te onganinate, paniro Tosorintsi icantiro”.

⁸ Igónijintasica Jesus ora iquenganeintaiga; yotabitaiganaqueri:

—¿Pairo piquenganeintobitaiga cara najitosorintsitasitaca?

⁹ Te ongomëtate nanganqueri: “Nojocajimiro ora picantagueti te onganinate, nomaguisantocotimiro”, carari comëtaro nanganqueri: “Pingabiritima, págairo pijatasi panëitanae”. Aroca nanganque: “Pingabiritima panëitanë”, queroca yanëiti, pisërontobitaiguëna. ¿Aisonorico?

¹⁰ Yamai noguibegajiri janaitatsiri arota nogótacagaiguëmiro cara icanquina Pabati: “Pijocajineri ira cantaguetiro te onganinate, arota eiro quero aguisëgotëtajari”. Nagabeiro Naronta paniacha Jonogaguitequë nomatsiguengatapë yaca quibatsica.

Aro icanqueri emëngari:

11 –Atsi pingabiritima, págairo pijatasi, pijáte pobangoquë.

12 Cara inetsaigaseguiri, icabiritanaca yágairo iatasi isotocanë. Iquenganeintasantaiganaca omagaro botoitachari, icantaiguë:

–Caninarisonori Tosorintsi. Yamai aniaiguëro ora te oneingani jirai.

Jesos icaimëri ira Irebí (aisati ijita Mateo).

(Mt 9.9-13; Ir 5.27-32)

13 Aro iátaji Jesus cara onamijaquë angaare cara yapatobiripari tojai matsiguenga. Yogometaignabaqueri.

14 Aro yabisëmatanë iniopëri Irebí itomi Arijeo. Irebí irianti coigotaguetiri iguireguite imatsiguenga ipagantineri igobeingarite canta Iromaquënta. Icampëri Jesus:

–Intsome, piguiatanëna.

Aro yaratinganë Irebí, yoguiatanëri.

15 Aique iáque Irebí ibangoquë yapaaguëri Jesus aisati irogomere aisati tojai aguiataiguëri Jesus. Aisati icaimaiguëri tojai coigotantatsiri aisati ira cantaguetiro te onganinate.

16 Ainta bariseopague ira ogomeantiro isanguenare Moisés iniaiguëri Ira Jesus cara yapëgotaiguëri coigotantatsiri aisati cantaguetatsiri ora te onganinate. Icantaiguëri irogomere Jesus:

–Te ingomeite Ogometimiri. Yapëgotaiguëri coigotantatsiri aisati ira cantaguetiro te onganinate. ¿Pairo icantobica negaca? Icantaguetiro Iriro te onganinate.

17 Cara iquemaigabaqueri Jesus, icantaiguëri:

—Ira cajigatatsi te ingoguii jompiantatsiri carari ira janaitatsi iriro coguiri. Te iroro nopocasite nangaimaguequeri caninatatsiri, irianti nangaimagueque ira cantaguetiro te onganinate.

Icomantë Jesus paio ora te iritibiritima irogomere.

(Mt 9.14-17; Ir 5.33-39)

¹⁸ Cara ititopiantaiga irogomere Joan baotisantatsiri aisati irogomere bariseo, ipocasitaigapëri Ira Jesus matsiguenga, yosamitapëri:

—Ititopiantaiga irogomere Joan aisati irasi bariseo. Ititaiga, yamanocotaiguëri Tosorintsi. Carari pasi pogomere yapaigui aisati yógaiga. ¿Paio te iritibiritima?

¹⁹ Yotabitaigabaqueri Jesus:

—Pigóiguë ora ametaiga cara iráque iina sërari. Ingaimaiguëri imatsiguenga, irapajaqueri, inganinataiganaque omagaro. Cara iraretaiguëma, ¿Aroco irititaigapëma? Quero itita iroontita itsibatari ira ágantatsi.

²⁰ Carari cara iriátë jaanta ira águërone iina, aro irititaiguëma igaimane.

²¹ Te ongomeite pinguemisantagarantiro ora yogometaiguimi bariseoegui aisati pingonaguëro nasi nogomeantane. Pigóiguë cara pigabitëro inaga piguitsagare, páguëro inagasite manchaguintsisite. Aroca pigabitantimaro iroraisite, cara ámanaquima ontisaraanaima oquibe ora inagasite piguitsagare.

22 Aisati pigóiguë ametaiga eiro oguëro iro-rai oja oba cara iriraimasiquë oisha. Cara onguëchotanë obaa iritopiganëma imasi, quero paraata. Quero pairi ogantarone oja oba irinagamasiquë. Igóque cara onguëchotanë oja oba intonganë irinagamasi, oparaatëma obaa, aisati iraparaquima imasi.

Yogometocoquero sábaro Jesus.

(Mt 12.1-8; Ir 6.1-5)

23 Cara sábaroquë iquenaiguë Jesus aisati irogomerejegui cara panguirintsisiquë. Ira irogomere yágaiguëro oguitsoterei tirigo.

24 Iniaiguëri bariseo, icantaiguëri Ira Jesus:

—Pinetseri pogomere. Jirai isanguenaque Moisés cara quero atarobacaati cara cataguitariquë comagoriantague. ¿Pairo te inguemisantobitaiguëri pogomere? ¿Pairo yobiguibiriquero tirigo yamai sábaroquë?

25 Yotabitaiganaqueri Jesus:

—¿Teco pinibatapinintiro Sanguenari ora comantëgotaiguëri David aisati ira itsibata cara jirai págaiguëri itasegane?

26 Aiti pan cara ibangoquë Tosorintsi, ora yobetsiquineri Tosorintsi poguëngani catingasatiquë Iriro. Ora pan iroonti iraperi saseriroti, te iranintacaguiri basini irapero. Carari icanaque David cara ibangoquë Tosorintsi cara inaseguí itingomi saseriroti jitacha Abiatar. Ira saseriroti ipabaqueri ira David pan, yapëro David aisati ipaiguëri ira icarataiguira, yapaiguëro aisati iriro.

²⁷ Pinetse, iritsita yobetsiquë Tosorintsi ira matsiguenga. Aique yobetsiquëneri ora cataguiteri comagoriantague. Te irobetsiquëngani matsiguenga asi sábaro.

²⁸ Nopaniaca Naro Jonogaguitequë, nomatsiguengatapë cara niboguë yaca quibatsica. Iroro nocomantëgotaguëquero sábaro pairoraca anganque cara sábaroquë.

3

Cara sábaroquë Jesus yogaguibegajiri ira camabocori.

(Mt 12.9-14; Ir 6.6-11)

¹ Icanaji Jesus aisati pongotsiquë cara yapato-taiga joríojegui. Tsomagui, ainta sërari camabocori poro ibaco.

² Ainta matsiguenga inetsaiguëri ira Jesus aroca iragaguibegajiri sábaroquë. Icogaiguë ingantocotaiguëri: “Itarobacaaque Jesus sábaroquë. Te inguemisantiro isanguenare Moisés. Te ingomeite”.

³ Aro Jesus icanqueri ira sërari camabocori:

—Atsi paratingue yaca aganguisatiquë cara iraniaiguëmi omagaro.

⁴ Aique icantaiguëri ira matsiguenga:

—Yamai nosamitaiguëmi: ¿Pairo isanguenaque Moisés paio caninatatsi anganque sábaroquë? ¿Caninataqueco angantiro ora caninaro, oraco angantiro ora te ongomeite? ¿Aganiatiri matsiguenga oraco agamaguëri?

Imairetaiganaque.

⁵ Aro inetsaguetaiguëri Jesus, iguisasërequeri aisati yogasëreca tenta iraninte inguemisantiri. Aro icanqueri sërari ira camabocori:

—Pintimagonaguitima pobaco.

Aro itimagonaguitanaca. Aito cara ibeganaa ocaninatanaï ibaco.

⁶ Aro isotocaiganaque bariseo cara pongotsiquë cara yapatotaiga joríojegui. Iátasitaiguëri iratirite Eroris, yosamitobaca:

—¿Pairoroco anganqueri Jesus, agamaguëri?

Cara iquenguitsatomonti Jesus aisati yoguibeganti cara angaarequë.

(Mt 4.23-25; 12.15-21; Ir 6.17-19)

⁷ Aro iáiganaque Jesus aisati irogomerejegui cara onamijaquë angaare, aisati yoguiataiganaqueri tojai Garireasati, aisati tojai Joreasati,

⁸ aisati tojai Jerosaresati, tojai Iromeasati, aisati tojai antatiquerrosati, aisati tojai Tirosati aisa Sirósati. Cara iquemocotaiguëri Jesus cara ita-songanti, iroso ipocasitobitaigapëri tojai matsiguenga.

⁹ Jesus icanqueri irogomere:

—Pomapënaró pitotsi, notetimaro arota quero itsinaquina tojai matsiguenga.

¹⁰ Aroquenta yoguibiaguequeri tojai matsiguenga, itsinatsinaitobaca janaitatsiripague, icogaiguë irotsagatiri Ira Jesus.

¹¹ Ira matsiguenga inantagueca camagari, cara iniaiguëri Jesus yobaticagueritotasipari. Icaimaiguë camagari:

—Jesus, Obiro Itomi Tosorintsi.

¹² Aro icantasantaiguëri camagari Jesus:

—¿Pairo picomantëcobiriquina? Pomairetaigue, quero picomantëgotina.

Icoigaiguëri irogomere Jesus.

(Mt 10.1-4; Ir 6.12-16)

¹³ Aique iáque Jesus cara oguitojaquë, icaimaiguëri irogomere ira icoigaiguë, aro iátasiiguëri.

¹⁴ Icoigaiguë icarati 12, icantaiguëri:

—Piguiataiguena, pintsibataiguena. Najitaiguëmi nagátane. Aiquenta nagátaguequemi pinguenguitsatomotagueantë.

¹⁵ Aisati nagabiaquemi arota pigátaiguëri camagari pijocaiguëri.

¹⁶ Icoigaiguëri 12: Simón aisati ijiqueri Peroro;

¹⁷ aisati Santiago itomi Sebereo, aisa Joan ireinti Santiago; ijitaiguëri ira pitirooti Boaneriji ora cantatsi yosiacaro omanarontsi;

¹⁸ aisati Antiris, Jeripe, Baritoromé, Mateo, Tomás, aisati Santiago itomi Arijeo, Tareo, Simón ira nintasantiro ibaísite;

¹⁹ aisati Joras Cariotisati ira ágagantëri Jesus.

Ora ijitocotaiguëri Jesus matsiguenga.

(Mt 12.22-24; Ir 11.14-15)

²⁰ Ipigaigapaa pongotsiquë Jesus aisati irogomere. Aitosati yapatobiritaigapari tojai matsiguenga irooti cara te irapabintae Jesus teatisati irogomere.

²¹ Cara iquemocoqueri imatsiguenga Jesus, iátasitaigabitaari iráganairime ibangosonoriquë. Icantobaca:

—Te iraneicotajima Jesus; intsome áganairi.

22 Aisati ipocasitaigapëri Jerosaresati irianti ogomeantiro isanguenare Moisés, icantocotasitaigapari:

—Ica sërarica inancari Berisebó aisati ijita Satanás itingomi camagari. Iroro ijogantaguëtari camagari.

Yotabitaiguëri bariseo Jesus.

(Mt 12.25-32; Ir 11.16-23; 12.10)

23 Aro Jesus icaimaiguëri matsiguenga. Cara ipocaigapë, icantaigabaqueri quingabaguirentsiquë:

—¿Atiroco ingantima Satanás irojocajima iriati? Quero icantiro.

24 Aroca irógobaguima matsiguenga timaigatsi quibatsiquë, ¿Queroco itsongabacaga?

25 Aisa icanta matsiguenga pongotsiquë, quero iquengaiga, querootisati itiomotobaga caninasati.

26 Tesonori iromitocotina Satanás cara nojoguetiri camagari. Ipëgatina. Arome Satanás inguisaiguëtime igamagarite, ¿Atiroco ingantima intingomibintaiguëmarime camagarijegui? Querome iquengaiga querome pini iragáantane Satanás.

27 Ira Satanás aisati icantari ibega sërari sintsiri. Aiti ibiane, ichaapite, itongomento, omagaro ora yomisantantaro ibango querota icositiri pairoraca irasi. Carari iribocapëca basini sërari sintsirisonori, irabisapëri isintsire, iragabiapëri, iraguëshotapëri, irágopitapëri irógomento ora yabentabeca, irágopitapëri pairoraca icogui. Carari quero yaguëshotiquiri quero yágui pairoraca.

28 Aisonori nangantasantaiguëmi cara Tosorintsi irojocaguetajineri matsiguengajegui ora icantaguëti te onganinate aisati ora icantasitaguëta, quero iguisasëretajiri,

29 carari quero icábintsiri ira cantëgotaguetasitaro Isëre Caninaro. Iriátë Sharincabeniquë.

30 Icanqueri Jesus negaca aroquenta icantocotaguetasicari matsiguenga cara inancari Jesus camagari.

Icomantë Jesus pairi imatsiguengasonori.

(Mt 12.46-50; Ir 8.19-21)

31 Piátasiqueri iniro Jesus aisati ireinti. Yaratinaigaigapë sotoquë, icaimagantaiguëri Jesus.

32 Tsomagui, isobiaque Jesus yogometaigaseguri arosonori matsiguenga sobicaigatsi ishongaigacari. Aro icomantaiguëri:

—Parepa piniro aisati pirentijegui. Ainta sotoquë; icogaiguini irinibataigapëmi.

33 Yotabitaiganaqueri Jesus:

—¿Pairoroco inato? ¿Pairiroco igueegui?

34 Aro inetsaguequeri ira sobicomotaigaseguri icantaiguëri:

—Ocaegui iroro inato, icaegui iriro igueegui.

35 Pairiraca cantatsi ora icocaqueri Tosorintsi, irianti nomatsiguengasonori: najitaiguëri igue, aisati tsio, aisati inato.

4

Jesus icomantëgotiri ira panguitatsiri.

(Mt 13.1-9; Ir 8.4-8)

1 Aitosati yoniagantaji Jesus cara onamijaquë angaare. Yapatoibiripari tojaisonori matsiguenga

irooti yoteantanaca cara pitotsiquë isobiaque. Përo cara inaiguë matsiguenga cara onamijaquë.

² Tojai yogometaguequeri, yogomeantacaro quingabaguirentsipague. Aro icantaguequeri:

³ —Pinguemaigue: ainta panguitatsiri iáque imiongaguitaguequero oguitsopague tirigo.

⁴ Opariguitagarantapë arosata oguitso onamiquë abatsi. Ipocaigapë tsimiripague yapaigapëro oguitso.

⁵ Basini tirigoguitso opariguitagarantapë mopësiquë. Te ine tojai quibatsi, aropirigasata arosonorinta mopë osobibatsaquero. Omanaanti piabitanaca;

⁶ cara ijonogatapë paba yogasiguiricapëro tenta ine oparipague.

⁷ Basini opariguitë cara totseisiquë; aro piabitanaca tirigo carari ora totsei pogamaguëro tirigo. Te ine oguitso.

⁸ Aiti basini tirigoguitso pariaquenguitsi caninabatsariquë quibatsi, pianë, piquibianë caninasati, oguitsotasantanë. Aiti panguirintsi oguitsotanë ocarati 30, aisati basini ocarati 60, aisati basini ocarati 100 oguitso.

⁹ Aitica piguemita ora piquemanta, pinguemisantiro ora nacantaiguëmi.

Pairo yogomebiri que Jesus quingabaguirentsiquë.

(Mt 13.10-17; Ir 8.9-10)

¹⁰ Cara iáiganaque matsiguengajegui, ainta Jesus paniro aisati itsibataigari ira aguiataiguëri aisati irogomere icarati 12. Yosamitaiguëri:

—¿Pairo ocanti ora posiacagantacái carani?

¹¹ Icantaiguëri Jesus:

—Nocogui pigóigue ati icanta Tosorintsi cara igáanti, ora te ogótingani jirai, carari ira matsiguengapague nogomeantacari quingabaguientsipague nosiacagantineri tenta iraninte irogóigue.

¹² Inetsabetaigaca carari te iranee, iquemaigabitaca carari te inguemaigue, te irogótaigabaquero ora nacantaigabitacari arota quero ipasiniatitaji querootisati ijocajiro ora icantagueti te onganinate. Iroro quero icábintsaguëtiri Torosintsi.

Igótacagaiguëri irogomere ora ocanti quingabaguientsi.

(Mt 13.18-23; Ir 8.11-15)

¹³ Aisati icantaiguëri Jesus:

—¿Teco pinguemaigabaquero oca quingabaguientsica? ¿Atiroco pingantaiguëma pinguemaiguëro basinipague quingabaguientsi?

¹⁴ Aro noniagaiguëmi ati ocanta iguengabaguire panguitatsiri. Ora oguitso aisati ocantaro Irinibare Tosorintsi.

¹⁵ Ora pariaquenguitsi abatsiquë ocantari ibega matsiguenga iquemaigabitacaro Irinibare, carari omanapague ipocasiqueri Satanás yágabitsaqueri ora iquemabeca, yomaguisantacaqueri.

¹⁶ Ora pariaquenguitsi mopèsiquë aisa ocantari matsiguenga quemaigabitacaro nanibare. Icaninabentabecaro carari iquemisantabecaro arosata.

¹⁷ Yosigaro panguirintsi ora te ine opari omanapague ocamaque. Cara iguisaneintobiqueri imatsiguenga, te përo inguemisantiro nanibare, opomirintsitomotanacari, aro ijocajiro

yomaguisantajiro cara iquemisantabeca tenta irogótasantiro.

¹⁸ Ora pariaquenguitsi totseisiquë aisati ocantari matsiguenga quemaigabitaro nogomeantane,

¹⁹ carari iquemisantabecaro arosata. Carari cara iquengasantanëro pairoraca inaguetatsi yaca quibatsica, iquengasantanëri iguireguitte inintasantiri, iquengasantanëro inganinabentiro pairoraca icogui inganque, aro yomaguisantanëro Irinibare Tosorintsi, te inguemisantanaïro. Te ine oguitso, te ingante ora caninaro.

²⁰ Ora oguitso pariaquenguitsi caninabatsariquë quibatsi, otojaiganaque, aisati ocantaigari matsiguenga porocague iraegui quemisantasantobëro ora nogometiri. Përosati iquemisantanaëna, icogui inganque omagaro ora icocaqueri Tosorintsi. Aisa icantaro pibega panguirintsi otojaiganaque openguiterei ora inatsi oguitso ocarati 100, aiti basini cara pinë 60, aisati basini cara ocarati 30 oguitso.

Jesos yosiacagantineri irogomere michero.

(Ir 8.16-18)

²¹ Aisati icantaiguëri Jesus:

—Oboqueroca michero, quero oguiro osobiquë cobiti. Querootisati oguiro osobira somamintotsi. Carari oguëroca jonoquë aro ongonijaque pairoraca.

²² Aitica ománocotaga yamai aro ongonijaque aiquenta. Ora te ogótingani yamai ogóquengani aiquenta.

²³ Aitica piguemita ora piquemanta, pinguemisantiro ora nacantaiguëmi.

²⁴ Aisati icantaiguëri basini:

—Yamai pinguengasantiro ora piquemaque. Aroca pigótoberō arosataanti ora nongomantēmi, aisati pingomantiri basini matsiguenga nogomeantane; aroca pigabisēneri ora pigóque, aro tojai nogótacagasantanēmi obiro aisati.

²⁵ Pigóiguē arosata yamai, carari aroca pinguemisantanēna nogótacagasantaiguēmiro nogomeantane. Irari basinipague te ingogue inguemisantina, quero iquemaiguina. Nágabitsaqueri ora iquemabeca, iromaguisanquero.

Jesos yosiacagantineri ora oguitso pianē piquibianē.

²⁶ Aisati icanē Jesus:

—Cara igáanti Tosorintsi ocantari ibega sērari ipanguitēro oguitso imiongaguitiro cara quibatsiquē.

²⁷ Cara isamapē, icabirica pabisanaque tojai cataguiteri. Aro pianē oguitso piquibianē, carari te irogóte casintaro atiraca ocanaca.

²⁸ Irotsita contepatsine otsoba cara quibatsiquē, aique osi, aique oquibianē opoa, aique onteganē onguitsotanē.

²⁹ Cara osamatanē oguitso, aro irobibinguiquero.

Jesos yosiacagantēneri mositasa.

(Mt 13.31-32; Ir 13.18-19)

³⁰ Aisati icanque Jesus, yosamitaiguēri irogomere:

—¿Yamai ati icanta Tosorintsi cara itingomibintiri matsiguenga? ¿Pairo nanganquero nosiacagantiro iragáantane?

³¹ Aisati ocantaro pibega oguitso mositasa, iroonti quiripiquirosonori.

³² Carari omanguitënganica oquibianë, abisëro basinipague panguirintsi. Piquibianë otsegopague, aro pamamegagueta aro ipocasitaiguëro tsimiripague, yogaiguëro imagosipague.

³³ Aro tojai Jesus yogomeantaro quingabaguirentsipague, yosiacagantëneri matsiguenga Irinibare Tosorintsi. Aroca iquemobëro arosata, aro arosata yogomequeri.

³⁴ Yameca Jesus yogomeantaigari quingabaguirentsi ira botoibiritaigapari. Iroonti quingabaguirentsi inibatantari. Carari icomantasantaiguëri irogomere casiriconiati ora ocanti quingabaguirentsi.

*Jesus yoguimairenquero sintsiri coguentima.
(Mt 8.23-27; Ir 8.22-25)*

³⁵ Irooti cataguiteri cara otsitinitanë, Jesus icantaiguëri irogomere:

—Intsome antatinta angaare.

³⁶ Aisati icantaiguëri matsiguenga ira botoibiritaigari onamijaquë:

—Yamai atsi pijáigue pobangoquë.

Ainta Jesus pitotsiquë. Aro yotetaiganaca irogomere iátocoiguë aiquero antatinta. Aisati yoguiatëgotaiganaqueri basiniquë pitotsipague.

³⁷ Aro ocoguentimapë sintsirisonori, omotoncaatanë nija, potiatanaca pitotsiquë. Pënibaqueme ojaganëmame nija.

³⁸ Ainta Jesus cara otsitíquë pitotsi isamasigui yonaguitosigaro manchaguinssi. Iátasiqueri irogomere, icabocapëri, icantaiguëri:

—¡Ogometinari! ¿Pairo te pintsorogobite? ¡Pigabisaicotái! ¡Pënibaque atsiticoiguë!

³⁹ Icabiritanaca Jesus, icanque:

—Omairiatanaeta angaare, osantocotanaeta coguentima.

Aito cara osantocotanai coguentima, omairi-atasantanai angaare.

⁴⁰ Aique icanqueri irogomere Jesus:

—¿Pairo pitorsogobitaiguë? ¿Pairo terai pinguemisantobitina?

⁴¹ Itsorogasantaignaque irogomere, iquenganeintasantaigaca, icantobaca:

—¿Pairo Ica? Inibatë, oquemisantasantanëri coguentima aisati angaare. Yoguimairenquero.

5

Jesus yogabisaicoqueri sërari inancari camagari.

(Mt 8.28-34; Ir 8.26-39)

¹ Aro yaretocoiganaca antatinta cara itimaigui Gararasati.

² Yaguëtanë Jesus cara pitotsiquë. Aro cara itia camatsirini ipaniaca sërari inancari camagari.

³ Itimi cara itia camatsirini. Te pairi aguëshotantimarine ora coshotsari sogatsa.

⁴ Aroque tojaitaque yoguëshotapinintaigabitacari imatsiguenga cara iguitiquë aisati ibacoquë carari itimishairo yobëshopiantairo yoguiripijitajiro. Te pairi agabeirine.

⁵ Përosati tsitiririqüë aisati cataguiteriqüë iátopiantë cara itia camatsirini aisati oguitojapagueqüë. Përo cara icaibainteti aisati itobaguecaro mopë.

⁶ Iniobëri jaanta Ira Jesus, isigasipari yobaticagueritotasipari,

⁷ icaimapë icampë catsigue:

—¿Pairo picantobipëna naro, Jesus Itomi Tosorintsi jonoqüënintaberi? Iniaquinanta Tosorintsi, nomanaquemini cara quero pitsipiriacaguina.

⁸ Inibatë negaca aroquenta Jesus igáqueri:

—Obiro camagari quimingari, pijátopitairi ica sërarica.

⁹ Aisati yosamitëri Jesus:

—¿Pairo pijita?

Yotabitanëri:

—Tojai najitaiga arosonorinta ninaigui.

¹⁰ Quero pigátaiguina jaanta.

Tojai yamanasantobëri Ira Jesus.

¹¹ Ainta inaigasegui arosonori chancho yapaigasegui cara tongagariqüë.

¹² Aro ira camagari yamanaiguëri Jesus:

—Aroca pijocaiguëna, pigátaiguena cara chanchoequiquë ninampëmari iriro.

¹³ Yotabitanëri Jesus:

—¡Atsi pijáigue!

Aro isotocaiganajiri sërari camagari, inantaigapari ira chanchoegui. Aro isigaiganaca chancho cara taranguqüë, imatsematseiganaque angaareqüë tobotn tobotn tobotn. Itsiticaiganaque ijogataiganaca omagaro chancho icarati 2,000.

¹⁴ Aro ira omisantaiguiri chancho isigaiganaca icomantagueigapëri imatsiguenga cara

poeboroquë aisati togantsipaguequë. Aique iátasitaiguëri Jesus tojai Gararasati iraniaiguëro omagaro atiraca ocanta.

¹⁵ Iniaigapëri Ira Jesus aisati ira inabitaca camagari. Ainta isobiaque iguitiquë Jesus, iquit-sagasiga, iquengaa caninasati, aisati inibatai caninasati. Aro itsorogaigapë matsiguenga.

¹⁶ Ira niaiguëro antagaisati icomantasantaigabaqueri basini ati icanta Jesus yogabisaicoqueri ira inabitaca camagari aisati icomantëgotaiguri chancoegui.

¹⁷ Aique iraegui Gararasati yamanaiguëri Ira Jesus:

—Atsi pijátaje yamai, quero pipocaji yaca aisati.

¹⁸ Aro yotetanaa Jesus pitotsiquë. Yamanabecari ira inabitaca camagari:

—Nocoguini naguiatanëmi.

¹⁹ Carari te iranintacaguri Jesus. Icanqueri:

—Quero poguiatina, pinëni. Pijátasitiri pomatsiguenga cara pobangoquë, pingomantiri ora icanquemi Tosorintsi tojai icábintsëmi.

²⁰ Aique iáque sërari icomantaguepëri Gararasati antagaisati Tecaporisiquë cara ocarati 10 poeboro ati ocanta cara yogabisaicoqueri Jesus. Iquenganeintasantacari omagaro quemaguëri.

Jesus yoguibegajiro araasetatsiri; aisati yoganiatairo irisinto Jairo.

(Mt 9.18-26; Ir 8.40-56)

²¹ Aique imontëcotanaa Jesus. Cara yaretaja onamijaquë antatinta, yapatoibiritaigapari onamijaquë tojai matsiguenga.

22 Yarepari sërari jitacha Jairo. Iriro obatacaguiri jorío cara pongotsiquë cara yapatotaiga. Cara iniopëri Jesus yobaticagueritotasipari,

23 tojai yamanasantapëri:

—Pënibaque ongamaque nasinto. Popogopë Obiro pogapënero pobaco arota obeganaima.

24 Aro iátacaqueri Jairo Jesus. Ainta tojai matsiguenga aguiataiganaqueri itsinatsinataiganaqueri Ira Jesus.

25 Ainta tsinane piraaseti cosamani ocarati 12 osarini, tojai otsipiriaque.

26 Pipënabentaguetabecari jompiantatsiri omagaro ora pasinta, te aropei te iromitocotëmatiro.

27 Oquemocotobëri Jesus, aro piátasiqueri itisitaquë Jesus, oquenopë antagaisatiquë matsiguenga, potsagaqueri Jesus cara ocarati iguitsagare,

28 oquianca: “Aroca iroonti notsagaitëri onamiquë iguitsagare aroje iragaguibegajina”.

29 Potsagaqueri, aito cara pibeganaa, aro ocaratanai oraa.

30 Aro igónijninca Jesus cara yogaguibegajiro poro itasorintsitequë. Yapisitaca, yosamitaiguëri matsiguenga:

—¿Pairi otsagaitënaró naguitsagare?

31 Yotabitaiganaqueri irogomere:

—Ishongaiguëmi tojai matsiguenga itsinatsinataiguëmi. ¿Pairó posamitobiquena: “¿Pairi otsagaitënaró naguitsagare?”

32 Përosati inetsaguetaiguëri matsiguenga arota iraniaqueri pairiraca otsagaqueri.

33 Aro otsoroganë tsinane omogomogoatanaca. Pigóque tiguëti ongantima ománanëma, cara

igóquero Jesus, aro parepari pobaticaguerito-
tasipari, ocomantëri antagaisati.

³⁴ Icanquero Jesus:

—Nomatsiguenga, aroquenta piquemisanquina
nogaguibegajimi. Yamai pijáte pingaigasëretanae,
pomagoriasëretanë.

³⁵ Cara inibasigui Jesus, yarepa iratirite Jairo
ipaniaca ibangoquë, icomantapëri:

—Aroque ocaunque pisinto. Pitsipiriasica ya-
mai páganëri Ira Ogomeantatsira.

³⁶ Iquemobëri Jesus, yotabitanëri ira
obatacagui jorío:

—Jairo, quero pitsorogui. Patiro
pinguemisantina.

³⁷ Te iranintacagui quero pairi aguiatirine, iri-
anti ira Peroro, aisati Santiago, aisati Joan ireinti
Santiago.

³⁸ Yaretaiganaca ibangoquë Jairo. Iniaigapëri
tojai matsiguenga iraicotaiguëro catsiguesonori
irisinto Jairo aisati yogasëretocotaigacaro.

³⁹ Aro icanaque Jesus tsomagui, icantaigapëri:

—¿Pairo picaibaibiriti? ¿Pairo piraicobiri-
taiguëro? Teni ongame janequi, pisamini.

⁴⁰ Icabíntsátaigabaqueri; aro igátaiguëri
antagaisati irisotocaigue sotoquë. Aro yáganëri
iri janequi, aisati oniro, aisati irogomere icarati
maba, icaiganaque tsomagui cara pinasegui
ogamaga irisinto Jairo.

⁴¹ Yágobagotapëro obaco Jesus, icanquero:

—Tarita, comi.

Ocanti: “Janequi, nanganquemi pingabir-
itima”.

⁴² Aito cara ocaniatanai, pipigapaa osëre, ocabiritanaa, oparintanaa panëitanai aroquenta pogabisë 12 osarini. Iniaiguëro ira inasegatsi tsomagui, iquenganeintasantaiganaca.

⁴³ Aro icantasantaiguëri Jesus:

—Quero picomantëmatiri pairiraca. Pomeroperi.

6

Ipiganaja Jesus Nasarequë.

(Mt 13.53-58; Ir 4.16-30)

¹ Aique iáque Jesus, ipiganaja yaretanaa iguebat-sitequë. Yoguiataiganajiri irogomere.

²⁻³ Cara cataguiteriquë ora camagoriantague, icanaque pongotsiquë cara yapatotaiga jorío, yogomeantapë. Iquemaigabaqueri tojai matsiguenga, iquenganeintasantaigacari icantaiganaque:

—Ica sërarica, irianti nomatsiguengasonori. ¿Nega opaniaca oca yogomeanti? ¿Nega opaniaca itasorintsite ora itasonganta? ¿Cagarico ira caripintero obetsiquiro mesa, sobicomentotsi, ira otomi María, ireinti Santiago, aisa José, aisati Joras, aisati Simón? ¿Aintasati iritsiroegui otimi yaca poeboroica?

Aro itsoingauguëri, icomëtaigacari, iguisaneintaiguëri.

⁴ Icanëri Jesus:

—Ainta quemisantaiguëri ira quinguitsatiro Irinibare Tosorintsi, carari itsoingauguëri imatsiguengasonori.

⁵ Tenta inguemisantaigueri cara Nasarequë te tojai iritosongantaguete Jesus cara. Porocagueanti yoguëro ibaco cara janaitatsiriquë, yoguibegajiri.

⁶ Iquenganeintasantanëri imatsiguenga Jesus tenta inguemisantaigueri.

Jesus igátaiguëri irogomere inguenguitsatague-tomotiri matsiguenga.

(Mt 10.1-15; Ir 9.1-6)

Iquenagueque Jesus poeboropaguequë.

⁷ Aro yapatotaiguëri irogomere caratatsi 12, igátaguequeri piteñaque, yagobiacagaiguëri irojogantaguequimari camagari.

⁸ Icantasantaiguëri:

—Nagátaiguëmi yamai, carari quero páganëro pairoraca. Iroonti páganë pigotiqui. Quero páganëro poperi, querootisati pitsaguine, querootisati quirequi.

⁹ Aisati pisapatote poganëma carari quero páganëro pite piguitsagare.

¹⁰ Aisati icanqueri:

—Atiraca pijáiguë, pingapë ibangoquë ira cajemobëmine. Pintiomotiri irooti cara pigaganëma.

¹¹ Aitica poeboro cara te iranintaigue irágacaninataigabaquemi te inguemisantaigabaquemi, popotetanëneri quibatsipane pisapatotequë, aro pigaganëma. Pingantiri: “Tenta pinguemisantobëna, aiquenta iratsipiriacaquemi Tosorintsi”.

¹² Aique iquenaguetaiganaque, iquenguitsataguetomotaiguëri matsiguenga:

—Pingantaigaima yacaquerooca obirojegui, pijo-
cajirola ora picantaguetira te onganinate.

¹³ Tojai igátaiguëri camagari jaara. Aisati itiri-
antari oguei asaitona tojai ira janaitaguetatsi, yo-
gaguibegajiri.

Eroris yógagantëri ira Joan.

(Mt 14.1-12; Ir 9.7-9)

¹⁴ Tojai matsiguenga iquemocotaiguëri Jesus,
aisati iquemocoqueri Eroris cobeingari cara
Garireaquë. Icanë:

—Irirojengari Joan baotisantatsiri, ira
camënguitsi caniatanaatsi. Iroro itasongantaguëti.

¹⁵ Carari icanque basini:

—Irianti Erías.

Basini icantocotaiguëri Jesus:

—Irianti comantantatsiri cantaca ira comantan-
tatsi jirai.

¹⁶ Carari Eroris iquemocoqueri omagaro,
icanque:

—Irirojengari Joan, ira nibatëacagantabitaca, ca-
niatanaatsi.

¹⁷⁻¹⁹ Aro jirai Eroris yágabitsaqueri iina ireinti
jitacha Jeripe. Iina jitacha Erorías. Icantopiantëri
Eroris Joan:

—Te ongomeite págabitsatiri iina pirenti. Ocanti
isanguenare Moisés: “Quero pinebetaro iina
basinipague”.

Oguisaneinqueri Joan Erorías, ocogas-
antabitaca ógagantirime carari te ongantiro tenta
iranintacaguiro Eroris ira ojimentaa.

²⁰ Eroris iniacaninatëri ira Joan. Igóqueri
Joan caninari, iquemisanqueri Tosorintsi.
Te iranintacaguiro Erorías cara ógagantiri.

Iquenganeintabitanacari Joan Eroris
iquemisantabecari; icogasanti inguemiri carari
te inguemisantiri.

²¹ Aro omoncarapaa cataguitëri cara iquianca
Eroris cara inë jirai. Icaimagantaiguëri tojai
itingomipague aisati itingomipague soraro aisati
basini ira obatacagaiguiiri Garireasati. Yapaa-
gaiguëri.

²² Aro ocanaque osinto Erorías, obairapë.
Poganinataiguëri Eroris aisati igaimane.
Icantasanotëro Eroris:

—Pomanina pairoraca ora pininti. Aro
nomëmiro.

²³ Cara aisonori iniaquina Tosorintsi, igóque
quero namatobitimi, nangantasanotëmi, paio-
raca pomanaguetina, aro nomëmiro. Pingoico-
quinaca aganguisati nagáantane, aro nomëmiro.

²⁴ Pisotocanai iroso, ocomantëro oniro, ocan-
quero:

—¿Ina, paio nomanaqueri?

Potabitanëro:

—Pomaniri ora iguito Joan baotisantantsiri.

²⁵ Ocanaji omanapague, ocanqueri Eroris:

—Nocoguini yamaica pógagantiri Joan baotisa-
tantantsiri, aique pomabaquinaro tsibetaquë igu-
ito Joan.

²⁶ Aro tojai yogasëretasantaca cobeingari cara
icantasanotëro quero yamatobitiro, aisati aro-
quenta iquemaiguëri antagaisati igaimane ora
icantasanotëro irisintotsari.

²⁷ Aro Eroris igáqueri poro soraro ógantantsiri
iriáte omanapague iráquintiro iguito Joan. Iáque
cara iromingamentoquë yobatëaqueri ira Joan.

²⁸ Aique yamapënero tsibetaquë iguito Joan, ipëro irisintotsari Eroris. Iroroque opëro oniro.

²⁹ Cara iquemaiguë irogomere Joan, iátasiqueri, yágaiganaqueri igamaga Joan itiajiri.

Itasonguëro pan Jesus, yomitojaiguëro.
(Mt 14.13-21; Ir 9.10-17; Jn 6.1-15)

³⁰ Ipigaigapaa irogomere Jesus. Yapatotaigapa icomantaigapëri antagaisati ora icantaiguë aisati omagaro yogometaiguë.

³¹ Ainta tojai matsiguenga ira bocasitaigapëri Jesus, aintasati ira pigaiganajacha. Tigueti ingantima irape Jesus aisati irogomere. Aro icantaigabaqueri Jesus:

—Intsome casiriconiati arota pomagoriaigue arosata.

³² Aro yotetaiganaja pitotsiquë iátocotaiguë cara tera ontimingani.

³³ Carari iniaigabaqueri matsiguenga cara iáiguë, igótaigabaqueri negaraca iriáiguë. Aro ipaniaigaca poeboropaguequë, isigaiganaca cara onamijaquë, ibataiguëri Jesus aisa irogomere, yaretaigaca teraiquerai iragatocopë Jesus, yoguiaigapëri.

³⁴ Cara yaguëtanë Jesus cara pitotsiquë, iniopëri tojaisonoru matsiguenga yapatoibiricari, icantaneintëgotagapëri inaisiguinta icantaigasega oisha ira te irine ira omisantiri. Aro tojai yogometaigapëri pairoraca.

³⁵ Cara ochapinitanë icantaigapëri irogomere:

—Yaca teca ontimingani, aroque ochapinitanë.

³⁶ Yamai pigátaigueri icaegui matsiguenga iriátagnetaje poeboropaguequë aisati togantsipaguequë iromananteta iraperi, tenta ine yaca.

³⁷ Yotabitaiganaqueri Jesus:

—Pomaigueri obirojegui ora irapaiguë.

Icantaiguëri irogomere:

—¿Pairo nangantaiguë? ¿Picogui najáte nomanantë pan ingaraque 200 tenario, nomaguetaiguëri? Querojengari cotonguiboro aguireguite.

³⁸ Yosamitaiguëri Jesus:

—¿Ati ocarati inatsi pasiatiegui pan? Atsi pijáte, pinetsero.

Cara igóquero irirojegui, icanqueri:

—Aiti pabocorooti pan, aisati ainta pite sima.

³⁹ Icantaiguëri irogomere Jesus:

—Pigasobicaigueri antagaisati irisobicagueigue arosatapague cara tobarisiquë.

⁴⁰ Aro isobicagueiguë. Ainta ira caraquenguitsi 100, aisati basini icarataiguë 50, aisati icantaigaca basinipague.

⁴¹ Aique yáguëro Jesus ora pabocorooti pan aisati pite sima, inetsanaque jonoquë, icanqueri Iriri:

—Pabati, nacarasiatocoquemiro oca noperijeguica popaiguënaca.

Aro itibatsaaguequero pan Jesus, yotsatengaiguëri irogomere arota imaignuëri matsiguengajegui. Aisati yotsatengaigacari sima.

⁴² Yapaiguë antagaisati, iquemaigaca.

⁴³ Aique yobiitagnetajiro irogomere ora irangarataneegui, iagajiro 12 cantiri.

⁴⁴ Yapaiguëro pan tojai sërari icarati 5,000.

*Yanëiatanë Jesus jonoicaa nija.
(Mt 14.22-33; Jn 6.16-21)*

⁴⁵ Aique icanque Jesus:

—Nogomere, potetaiguema pitotsiquë.
Pomontiaiganajima, pobatina antatinta
cara Betsairaquë. Yamai nagátaiguëri ira
botoibiritaiguina iriáigue ibangopaguequë.

⁴⁶ Aro igátaiguëri yobetsataiganajari. Aique
iáque Jesus oguitojaquë yamanopë, inibataqueri
Iriiri.

⁴⁷ Ainta Jesus paniro inë cara otsitinitanë. Ora
pitotsi pinë aganguijaquë.

⁴⁸ Iniaiguëri irogomerejegui icomatabitacaro
pitotsi, carari poguipigapigatocoqueri sintsiri
coguentima. Aro igogaraaque iáque Jesus aiquero
pitotsiquë, yanëiaapë jonoicaa angaarequë, te
iritsitigue. Irabisanaquerime,

⁴⁹ carari iniaigabaqueri yanëiaapë jonoicaa nija,
icaibaitaiguë icantobaca:

—¡Eeee! ¡Coraque camagari cara iráganacái!

⁵⁰ Antagaisati iniaigabaqueri, itsorogasan-
taiganaqueri. Aro yotabitaigapëri Jesus:

—Quero pitsorogui. Naanti bocapaatsi, pingani-
nasëretanëtigue.

⁵¹ Aro yotepa Jesus pitotsiquë, itsibataigaari.
Aito cara osantocotanai coguentima; iniaiguëro
irogomere iquenganeintasantaiganaca.

⁵² Aisati icanta iniaigabitacaro pan cara ita-
songuëro Jesus carari te inguengairo. Aisati ini-
aigabitacari Jesus cara yanëiaquero nija, carari
terainta irogótiri Irironta Itomi Tosorintsi.

Jesos yogaguibegajiri janaitaguetatsiri cara Jenesarequë.

(Mt 14.34-36)

⁵³ Aro imontiaiganaja. Yaretaiganaja Jenesarequë. Yoguëshotëgotagapëro ibito.

⁵⁴ Cara yaguëtaiganaque, igótobëri Jesos matsiguenga.

⁵⁵ Cara igóiguë ainta Jesos aro isigaiganaca icomantobaguetanaca matsiguengajegui poeboropaguequë, yamaigapëri janaitaguetatsiri yamantaguepari jatasinsi.

⁵⁶ Iquenagueque Jesos poeboropaguequë aisati togantsipaguequë. Negaraca iáque, yamapëri janaitatsiri, yoguëquineri iraganguitëirequë cara iniobëri Jesos yamanaiguëri:

—Pinintacaguina notsagaitimiro piguitsagare cara ocarati.

Aro yogaguibegajiri antagaisati ira otsagaqueri.

7

Ora yametaiga jorío.

(Mt 15.1-9)

¹ Aro yapatoibiritaigapari Jesos ira bariseopague aisati ira ogomeantiro isanguenare Moisés. Ipaniaigaca Jerosarénquë.

² Iniaigapëri irogomere Jesos cara yapaigui; te inguibocotima. Icantaiguë bariseo:

—Caninataque inguibocotaiguema queroquerai yapi arota iraganinasëretima. Cara te inguibocotima, iroonti quimingari ibaco.

³ Yametaiga bariseoegui aisati omagaro joríojegui queroca iquibocotasanta, quero yapi,

cara yametaiga jirainisati aisati yogometaiguëri ira jorío.

⁴ Cara iripigaima cara poeboroquë cara yapatotaiga matsiguenga ipimantaguëti pairoraca, queroca iquibocota jorío, quero yapi. Aisati yametaiga inguibopiantiro pairoraca basini: pojo, pachaca, oya, omagaro.

⁵ Aro ira bariseo aisati ogameantiro Sanguenari yosamitaiguëri Ira Jesus:

—¿Pairo te irometaigabiritimaro pogomere ora yametaiga omatsiguenga jirai? Yapantaigacaro ibaco quimingari. Icantaguëti ora te onganinate.

⁶ Yotabitaiganaqueri Jesus:

—Obirojegui matobiantatsiri cara aisonori icomantëgotaguëmi Isaías cara isanguenaque jirai: Icanë Tosorintsi: “Ica matsiguengaca inibatasitëgotina ora caninaro, carari te inguenganeintina.

⁷ Yamanocotasitina carari yapatotasitaiga; iroonti yogomeantaigui irasi matsiguenga”.

⁸ Aisati icantaiguëri Jesus:

—Teni pinguemisantiro ora icanquemi Tosorintsi, pijocasicaro; iroonti piquemisantasica ora yogomeanti matsiguenga.

⁹ Cara pametaigaro iroonti irasi pomatsiguenga, pitsoingauguëro ora icanque Tosorintsi.

¹⁰ Isanguenaque Moisés:

Pinguemisantiri piri aisati piniro. Ingameta ira cantëgotaguëtasitari iriri aisati iniro.

¹¹ Carari obirojegui, pogometaiguëri pomatsiguenga: “Pingantiri ira asintimi: ‘Quero nomitocotimi. Nomëmime quirequi, nangantaneintëgotëmime carari aroque natsita

nacanqueri Tosorintsi nopëri Iriro naguireguite’
”

¹² Cara picanque negaca, te pinintacaguiri ingábintsairi iriri aisati iniro,

¹³ te pogomeantiro Irinibare Tosorintsi, teatisati pinguemisantiro. Iroonti piquemisantaiguëro ora yametaiga pomatsiguenga jirai aisati pogaganëneri basini. Aitosati aiti tojai ora picanque cantacha nega.

Jesos yogometocoquero pairoraca aguiminasëretiri matsiguenga.

(Mt 15.10-20)

¹⁴ Aique Jesos icaimaiguëri ira botobiritaigari, icantaiguëri:

—Pinguemina, obirojegui, pigótiro oca nocomantaiguëmica:

¹⁵ caninataque opaiguero pairoraca queronta poguimingatiro asëre. Orari ora inibatasitagueta iro ro aguiminasëretacái cara aquianquero quimingaro.

¹⁶ Aítica piguemita ora piquemanta, pinguemisantiro ora nacantaiguëmi.

¹⁷ Aro ijocaiganaqueri matsiguenga botoitacha sotoquë, ícanaji Jesos pongotsiquë cara yosamitëri irogomerejegui:

—Teni nanguemimi; pingomantina ora ocanti picantaiguëri matsiguenga yamai.

¹⁸⁻¹⁹ Yotabitanëri Jesos:

—¿Teraico pigóte obirojegui aisati? ¿Teco pigóte pairoraca opë ojáque asegotoquë aique agabisaïro? Te ongantiro pairoraca asërequë.

Iroro yogomeantaguëque cara antagaisati perintsi caninaro opëro.

²⁰ Aisati icanque:

—Ora paniacha iraneingomentoquë matsiguenga, ora iquengagueta, iroro aguimingatëri.

²¹ Ora iquenga matsiguenga opaniaca tsomagui. Iquenguiro quimingari, aique icanquero te onganinate. Cara intaguetiro tsinane cagaro iina aisati cara tsinane ontaguetiri sërari cagari ojime; cara icositanti; cara yóganti;

²² cara inebetaro ora irasi basini; cara icantagueti pairoraca te ongomeite; cara yamatobianti; cara inintasanotëtiri ora yasinta basini; cara icantocotaguetasitari basinipague matsiguenga; cara iquengasita caninari iriati; cara te inguengueri Tosorintsi;

²³ antagaisati ocapague paniacha cara iraneingomentoquë matsiguenga. Iroro oca aguimingataguetiri; carari Tosorintsi iniaqueri matsiguenga cara icantaguetiro quimingari.

*Oquemisanqueri Jesus tsinane cagaro jorío.
(Mt 15.21-28)*

²⁴ Aique iáque Jesus aronisatiquë Tiro. Icanaque pongotsiquë, te iraninte irogótirime matsiguenga, carari tiguëti ingantima irománima.

²⁵ Ainta tsinane, ora osinto inancaro camagari. Cara oquemocoqueri Jesus, piátasiqueri pobaticagueritotasipari iguitiquë Jesus.

²⁶ Iroro cagaro jorío, opaniaca cara Sirojenisi-aquë. Pamanopëri Jesus:

—Inancaro nasinto camagari. Pigátajinero.

27 Icanquero Jesus:

—Nipocasique naguibatëri nomatsiguengasonori nomitocoqueri iriro. Caninataque irapeta iritsita janequi. Te ongomeite ágabitsatiri pan janequi arota omionguëneri otsiti itiomijani.

28 Carari potabitanëri:

—Aisonori ora picanque, Natingomi, carari yapiro otsiti opetoqui ora yobariaguetaigui janequi.

29 Icanquero Jesus:

—Caninataque piquemisanquena. Yamai pijátaje. Ira camagari aroque isotocanaïro pisinto.

30 Aro pipiganaja obangoquë, oniopairo osinto pinariasega osamamentoquë. Aroque isotocanaïro camagari.

Jesos yoguibegajiri sërari maguemitari.

31 Aique yogaganaca Jesus, iquenaque Tiroquë, Sirónquë, aisati Tecaporisiquë cara pini 10 poeboro. Yaretaja angaarequë jitacha Garirea.

32 Yamaigapëri poro sërari maguemitari aisati te irinibatasante. Yamanaiguëri Ira Jesus iroguineri ibaco iragaguibegajiri.

33 Ainta tojai matsiguenga. Aro Jesus yáganëri casiriconiati, yomianquineri ibatsapaco cara iguemitaquë. Ijobabococa, yotsaganinequeri ira te irinibate cara ininequë.

34 Aique Jesus inetsanaque cara Jonogaguitequë, yaneingasantanë, icanque:

—Epeta.

Epeta ocanti pishapiriaguemitatanaïma.

35 Aro ishapiriaguemitatanaa, iquemasantanai. Aisati posebatanaa inine, inibatasantanai.

³⁶ Aro icantasantaiguëri Jesus:
—Quero picomantëmatiri basinipague
matsiguenga.

Carari te inguemisantaiguëri, aiquero
icomantëgotanëri.

³⁷ Ira matsiguenga iquenganeintasantëri Jesus,
icantaiguë:

—Antagaisati icanque caninari. Iquemacaguiri
maguemitari aisati inibatagairi ira te irinibate
caninasati.

8

Yogatsitairo Jesus yomitojaiganaquero pan.
(Mt 15.32-38)

¹ Basiniquë cataguiteri aisati yapatotaigaa to-
jai matsiguenga. Te inëmate iraperi. Jesus
icaimaiguëri irogomere, icantaiguëri:

² —Tojai nacantaneintëgotaguëri icaegui boto-
biritaguënaca. Ocarati maba cataguiteri itsi-
bataiguëna, yamai te inae iraperi. Itasegasan-
taiguëni.

³ Yamai aroca nagátaiguëri iriáigae, iromago-
tasantanë queronta yapi, quero yaretaigaa iban-
gopaguequë. Ainta paniacha jaanta.

⁴ Yotabitaiganaquëri irogomere:
—Pinetse, yaca teca ontimingani. ¿Nega
nágaiguëri pan ora irapaiguë? Tojaini ini.

⁵ Yosamitaiguëri Jesus:
—¿Ati ocarati pan inatsi?
Icantaiguëri irogomere:
Siete ocarati.

⁶ Aro icantaiguëri matsiguenga Jesus:
—Pisobicaigue quibatsiquë.

Aique yáguëro pan ocarati 7, icanqueri Iriri:

—Aro nega, Pabati, nacarasiaquemiro popabaquinaro oca perintsica.

Aique itibatsaaguequero yotsatengaiguëri irogomerejegui arota irotsatenguimaro ira bototaigacha.

⁷ Aintasati arosata isibaite. Icarasiatocoqueri, icantaiguëri irogomere:

—Pomaguetaiguëri sima aisati.

⁸ Yapaiguë antagaisati, iquemaigaca. Aique yobiitaguëtajiro ongarataga, iagajiro cantiri oquibe ocarati 7.

⁹ Ainta icarati 4,000 matsiguenga ira paiguënguïtsi. Aique igátaigairi yobetsataiganajari Jesus:

—Yamai pijáigae pobangopaguequë.

Icogabeca bariseo iritosongueme Jesus.

(Mt 15.39-16.4; Ir 12.54-56)

¹⁰ Aique yotetaiganaja Jesus aisati irogomere pitotsiquë, imontiaiganaca irooti cara quibat-siquë jítacha Tarimanota.

¹¹ Ipocasitaigapëri bariseopague. Isintsitsapëri, icampëri:

—Atsi yamai nocogaiguini nanetsemi cara pita-songanti arota nogótimi aroca popaniaca Jonaga-guitequë.

¹² Aro yaneingasantanë Jesus, icantaiguëri:

—¿Pairo yamanobitina icaegui matsiguengaca cara natasonganque? Aisonori nangantasan-taiguëmi cara quero noniaguëmatiri, quero nita-songanti.

¹³ Aique iáque ijocaiganaqueri bariseo, yotetaja aisati pitotsiquë iátocotaji antatinta.

Ora piponganta pan irasi bariseo iroonti irogomeantane.

(Mt 16.5-12)

¹⁴ Yomaguisantanë irogomere iráganëro pan. Patiro yáganë.

¹⁵ Icantaiguëri Jesus:

—Pigamaiguemaro ora piponganta pan irasi bariseoegui aisati irasi iratirite Eroris.

¹⁶ Aique yosamitobagaigaca irogomere:

—¿Pairo icantobicái: “Pigamema ora piponganta pan irasi bariseo”? Tentajengari nomapëro pan.

¹⁷ Igótcotaiguëri Jesus, icanqueri:

—¿Pairo pijibiritaiguë nacantocoquemiro pan? ¿Terai pingueme teraisati pigóte ora nacantaiguëmi? ¿Teco pinguengaiguena?

¹⁸ Aiti piroqui, ¿Pairo te piniantobitimaró? Aiti piguemita, ¿Pairo te pinguemantobitimaró? ¿Teco pinguengairo? Cara natibatsaaguequero pabocorooti pan napaagaiguëri 5,000 sërari, ¿Ati ocarati cantiri piagaji ora ongarataga?

¹⁹ Yotabitaiganaqueri:

—Aro ocarati 12.

²⁰ Përosati icantaiguëri Jesus:

—Aisati aique ocarati 7 pan, aisati nopague-taiguëri pan matsiguenga icarati 4,000. ¿Ati ocarati pobiitaguetaji cantiriquë oquibe?

Icantaiguëri:

—Ocarati 7 cantiri.

²¹ Aro icantaiguëri Jesus:

—¿Terai pigóigue cara te nangantocotaiguemiro pan? Nacantocotaiguemiro irogomeantane bariseo.

Jesos yoguibegajiri comarajari cara Betsairaquë.

²² Aisati yaretaigaa Jesos aisati irogomere Betsairaquë. Yamaigapëneri comarajari, icantaigapëri:

—Potsagatiri piniacagajiri.

²³ Aique Jesos yáganëri comarajari ibacoquë icatsatanëri sotoquë poeboro casiriconiati. Ijobaoquiqueri iroquiquë, yoguëneri ibaco Jesos cara comarajariquë. Yosamitëri:

—¿Ainta pinei arosata?

²⁴ Inetsë, yotabitanëri:

—Jee, naniabecari sëraripague carari te ingonijataigue caninasati, icantaigacaro pibega an-chato, carari yanëitaiguini.

²⁵ Aitosati Jesos yogaineri comarajari ibaco. Aique inetsai, ibeganaa, iniasantai caninasati.

²⁶ Aro igáqueri Jesos:

—Quero piáti poeboroquë, quero picomantiri basini, aroonti pijátaje pobangoquë.

Igóti Peroro cara Jesos Irianti Agabisaicoontasiri.

(Mt 16.13-20; Ir 9.18-22)

²⁷ Aique iáque Jesos, itsibataiganacari irogomere aiqero poeboroquë jitacha Sesária Jeripo. Cara aganguipoqui abatsi Jesos yosamitaiguëri irogomere:

—¿Pairo ijitaiguina matsiguenga Naro?

²⁸ Yotabitaiganaqueri:

—Aintapague ijitaiguëmi Obiro Joan baotisanantatsiri. Ainta basini icantaiguë: “Ira Jesus Irianti Erías, ipocaji”. Aintasati ijitaiguëmi Obiro comantantatsiri jirai ipigapaa.

²⁹ Aro yosamitaiguëri:

—¿Pairo picantaigui obirojegui?

Yotabitanëri Peroro:

—Obiro Quirisito Agabisaicoontatsiri.

³⁰ Jesus icantasantaiguëri:

—Aisonori picanti, carari quero picomantague-tiri matsiguenga cara Naro Quirisito.

Jesus icomantaiguëri irogomere cara ingamaque.

(Mt 16.21-23; Ir 9.22)

³¹ Aique iparintaca Jesus yogometaiguëri irogomere icantaiguëri:

—Pigóiguë nopaniaca Jonogaguitequë, nomatsiguengatapë cara niboguë yaca quibatsica. Yamai pënibaque najáque Jerosarénquë. Cara, iratsipiriacagaigabaquina antiasipari aisati itingomiegui saseriroti aisati ira ogomeantiro isanguenare Moisés. Aisati irógaiguëna, carari ongaraque maba cataguiteri, nanganiatanae aisati.

Ocari oca icantabecari catingasati.

³² Aro yáganëri Peroro casiriconiati ipëgatsacari:

—Natingomi, te onganinate oca picanqueca. Querota picami.

³³ Yapisitasicari Jesus, inetsaiguëri irogomere, isintsitsaqueri Peroro:

—Pijáte, picanquina aisati picantari ibega Satanás. Quero pintaguaro ora te onganinate. Te

pigóte ora icocaquina Tosorintsi, iroonti pigóque ora icogui matsiguenga.

Ora inganque ira quemisantantiri Jesus.

(Mt 10.38-39; 16.24-28; Ir 9.23-27; 14.27)

³⁴ Aique Jesus icaimaiguëri ira botoibiritaigari aisati irogomere, icantaiguëri:

—Iranintasantëca pairiraca iraguiatanëna inguemisantantina, iranatanëro igorosite, quero icantanonta iriati, iroonti përosati iromirintsibenquinaro pairoraca nongocaqueri Naro.

³⁵ Ira cogabitacha ingábintsëma yaca quibatsica, tenta iraninte iratsipiriero, aiquenta iratsipiriasantë. Irari quemisantantënanane yaca quibatsica quero ipasiquitina querootisati ipasiquitiro Caninaro Nibarintsi, irooti cara ingamobiquina Naro, aiquenta intiomoquina përosati Jonogaguitequë, intimasantanë caninasati.

³⁶ Aintaca sërari irasintaguetimaro antagaisati ora inatsi yaca quibatsica, aique ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro?

³⁷ Aroca iriátë Sharincabeniquë, tiguëtisonori ine pairoraca ingantima iriátëme Jonogaguitequë, inganiatanaeme.

³⁸ Pairiraca pasiguitëgotina Naro aisati ipasiquitocotiro nanibare yaca quibatsica cara itimaigui tojai tsoengatsiri cantagueantatsiri te onganinate, aisati nopasiquitocoqueri iriro cara nopigaima. Nopigaima nongobeingatasantapë nosangueguitetasantapë aisati icanta Pabati icobeingatasanti yosangueguitetasanti,

intsibataigapëna ironomireegui Pabati
irisaanganetsite caninari.

9

Ipasiniatitanë Jesus.

(Mt 17.1-13; Ir 9.28-36)

¹ Aisati icantaiguëri Jesus:

—Aisonori nangantasantaguëmi, nogomerejegui, aintapague obiroquë queroquerai cara picami irooti cara piniagabaquina nopocaje Naro iragáantanequë Tosorintsi.

² Aro pabisanaque 6 cataguiteri cara Jesus itonganaque oquibequë oguitoja. Yágaiganaqueri casiriconiati ira Peroro aisati Santiago aisati Joan. Aro ipasiniatitomoqueri Jesus.

³ Oquetatasanotanë iguitsagare. Teni irine yaca quibatsica inguibiroca quitsagarintsi catarosonori aisa pibega oca.

⁴ Aisati iconijatompëri Moisés aisati Erías inibatagaiguëri Jesus.

⁵ Aro icanqueri Peroro:

—Ogometinari, caninataque inaigae yaca. Intsome obetsique yaca maba pongotsi otiomijani, patiro pasi, patiro irasi Moisés, aisati basini irasi Erías.

⁶ Te irogóte Peroro pairoraca inganque, inibata-sita itsorogasantaganaquenta ira maba.

⁷ Aito cara omabocapari mingori paguëtaguëpëri, poganguibotaiganaqueri. Aro iquemaiguëro Irinibare Tosorintsi cara mingoriquë, icanque:

—Ica Notomi nanintasantiri. Pinguemisan-taiguëri Iriro.

⁸ Iroguito, inetsabetanaa. Te iraniajiri Erías, teatisati Moisés; panibani Jesus inanai.

⁹ Aique cara yanongaiganaja, icantasantëri irogomere Jesus icantaiguëri:

—Quero picomantëgotiro oca piniaguëca. Aiquenta cara nangamaque aisati nanganiatanae, aro pingomantaiguëri basini matsiguenga. Pingomantëgotina Naro omagaro ora pigótocoquina aisati cara nopaniaca Jonogaguitequë aisati nomatsiguengatapë.

¹⁰ Aro te ingomantëgotiri, patiro iquengasitanaca, yosaminatobaganaca iriati:

—¿Pairo icomanti Jesus cara icanque ingamaque aisati inganiatanae?

¹¹ Aro yosamitaiguëri Ira Jesus:

—Ira ogomeantiro Sanguenari cantatsi: “Iribocapae iritsita Erías queroquerai ipoqui Quirisito Ira Agabisaicoontatsi”. ¿Pairo yogomebiri que oca? ¿Pairo te iribocobipë Erías?

¹² Yotabitaiganaqueri Jesus:

—Aisonori icantaiguë: “Ingonijapae Erías, iro-betsicaigapëri omagaro”. Carari pinguenguero oca: ¿Pairo isanguenatocobiriquina Naro matsiguengatapënguïtsine, natsipiriaquero, aisati iromaintaigabaquina matsiguenga?

¹³ Yamai nongomantaiguëmi cara aroque ipocaji Erías carari te irágacaninataigabaqueri matsiguenga, icantaiguëri pairoraca ora inintaiguë, itsipiriacagaigabaqueri, yógaiguëri aisa ocanta cara isanguenatococa Sanguenariquë.

*Jesus yoguibegajiri janequi tingaraachari.
(Mt 17.14-21; Ir 9.37-43)*

¹⁴ Cara yanongopaa Jesus, iniaigapëri arosonori matsiguenga. Aintasati irapague ogomeantiro isanguenare Moisés inibataigaseguiri irogomerejegui Jesus icarati 9.

¹⁵ Aro iniaigabaqueri Ira Jesus, iquenganeintasantaigabacari. Isigasigaitasipari matsiguengajegui, yobetsataigabacari.

¹⁶ Yosamitaigapëri matsiguenga Jesus:

—¿Pairo pinibabiritaiguëri nogomere?

¹⁷ Yotabitanëri poro sërari:

—Ogomeantatsiri, namabitapari notomi inancari camagari. Yomasontiaqueri.

¹⁸ Cara iráquerica camagari intingaraacaquimari, irobariaqueri quibatsiquë, irisimaresetaganëri ibagantequë; iratsitsiaguitetanë, ingantsirongatanë. Namanabecari pogomere iragátajineri igamagarite carari te iragabeiri.

¹⁹ Yotabitaiganaqueri Jesus, icantaiguëri:

—¡Te pigóiguero Irinibare Tosorintsi! ¡Terai pinguemisantaiguero obirojegui, terai pinganinataigue! ¿Ati ongantima nantsibataiguëmi natsipiriasita cara nogometasitaiguëmi? Tojai pitsoingaiguëna. Atsi pomapënari pitomi.

²⁰ Cara yamapëri janequi, itingaraacaganacari camagari, imogomogoataganacari, yotëanëri janequi quibatsiquë, ititigabaguetacaganacari, yosimaresetanëri aisati.

²¹ Jesus yosamitëri iriri:

—¿Ati ocanta iparintaca cara icanca nega?

Yotabitanëri iriri:

—Irinaga jirai cara itiomijaniquerai.

²² Tojai yobarigopiantiri camagari cara tsitsiquë aisati nijaaquë, icogabeca iragamaguerime.

Aroca pigabeiro pinganquero pairoraca, aro pingantiro yamaica. Pingantaneintëgotaiganaquina, pomitocotaiguena naro aisati notomi.

²³ Icanqueri Jesus:

—¿Pairo picantobiquina: aroca nagabeiro? Atsi obiro. Aroca pinguemisanqueri Tosorintsi, aro inganquimiro pairoraca.

²⁴ Aro icaimanë iriri janequi:

—¡Naquemisantabetimi! ¡Nocoguini pinguemisan-tacagasantina!

²⁵ Iniaque Jesus cara yotsititaigapari tojai matsiguenga, aro isintsitsaqueri camagari, igáqueri:

—Obiro camagari mosontitagantatsi aisati maguemitatacagantatsi pisotocanairi, quero pinantajari ica janequica aisati.

²⁶ Aro icaimanë camagari, imogomogoataganacari ira janequi, isotocanai. Iriroque janequi icanacari ibega igamaga. Icantaiguë tojai matsiguenga:

—Aroque icamaque.

²⁷ Carari Jesus yágobagotëri ibacoquë janequi icabiritajiri, yogaratingajiri, ibeganaa.

²⁸ Aique icaiganaque pongotsiquë Jesus aisati irogomerejegui, yosamitaiguëri casiriconiati:

—¿Pairo te nagabiobitiri nagátiri ira camagari?

²⁹ Yotabitaiganaqueri Jesus:

—Ica irianti basiniati camagari, sintisiri ini. Patiro iriátë aroca pomanocotasantiri Tosorintsi aisati aroca pititima, aro iragabiaquemiri pigátiri jaara.

Yogatsitai Jesus icomantaigairi irogomere, icanqueri: “Pëñibaque nanagamaque”.

(Mt 17.22-23; Ir 9.44-45)

³⁰ Aique iáiganaque Jesus aisati irogomere, ique-nagueque Garireaquë. Te iraninte Jesus irogóte pairiraca negaraca ini Iriro

³¹ yogometaiguirininta irogomere. Ican-taiguëri:

—Nopaniaca Jonogaguetequë, nomatsiguen-gatapë cara niboguë yaca quibatsica. Carari irácagantaiguëna matsiguenga, irógaiguëna. Ongaraque maba cataguiteri, aro nanganiatane.

³² Ira irogomere te inguemaigabaquero irogomeantane Jesus, icomëtaigabacaro. Aisati itsorogaiguë irosomitiri pairoraca icanti.

Icomantë Jesus pairi obaquenguitsine cara itin-gomibintanti Tosorintsi.

(Mt 18.1-7; Ir 9.46-48)

³³ Yaretaiganaca Caperinaoquë, icaiganaque pongotsiquë. Jesus yosamitaiguëri irogomere:

—¿Pairo pinibatobagopa abatsiquë?

³⁴ Te irotopitaiguëri, imairetaiganaque aro-quento cara abatsiquë inibatobagopa iriati pairi obaquenguitsine irirojeguiquë.

³⁵ Isobigopë Jesus, icaimaiguëri irogomere icarati 12, icanqueri:

—Pairiraca nintatsi irobate, caninataque in-garantanë, iromitocotaiguëri antagaisati basini aisa inganquima iromeraro.

³⁶ Icaimëri poro janequi Jesus. Yogaratianqueri aganguisatiquë irogomerejegui, yabitsinacobëri. Icantaguëri:

³⁷ —Pairiraca ágacanimatërine poro janequi cantacha ica iquemisanquinanta, aisati irágacanimatina Naro. Pairiraca ágacanimatenane, aisati irágacanimatiri Ira agáquina.

Quero pometopitari basini quemisantatsiri.

(Ir 9.49-50)

³⁸ Icanqueri Joan:

—Ogometinari, naniaiguëri sërari igáqueri camagari iriátopitiri matsiguenga. Icantabequina cara iquemisanquemi inibatantaro popairo, iroro igáantantari camagari. Tenta intsibataiguena narogui, nacantaiguëri: “Quero pigáantantaro iripajiro Jesus cagaribinta obi-ro nasieguí”.

³⁹ Yotabitanëri Jesus:

—Quero pometopitari. Queroca iguisasitái, iromitococái. Quero icantocotaguetasitina.

⁴⁰ Queroca ipëgatái, aisa icancái ibega eiro.

Icanque Jesus: “Pingábintsabacaquima”.

(Mt 5.29-30; 10.42; 18.6-9; Ir 17.1-2)

⁴¹ Aisati icanqueri Jesus:

—Pairiraca pëcoquimine pomire piquemisanquinanta, nangantasantëmi iraniaqueri Tosorintsi imëri iriro aroquenta icábintsabaquemi obi-ro.

⁴² Aisati pairiraca antaquerine janequi quemisanquina ora te onganinate, natsipiriacaqueri. Caninataqueme ingamaque queroquerai intagui-ri ora te onganinate, aisa onganquimame iraguëshotëgotanquimari oquibe mopë itsonoquë, irojoqueri angaarequë ingamaque.

⁴³ Nosi-acagantëmi-ro. Aroca ontaquimi pobaco ora te onganinate, pijocajiro ora picantagueti

quimingari. Pobetsiquiro pisëre aisatime ongantima pitotirome pobaco pijoquerome. Caninataque pine paboconirobi cara Jonogaguitequë, arota quero piátacaguiro pite pobaco cara Sharincabeniquë cara pini tsitsi ora te otsibacanete,

⁴⁴ aisati cara te ingame oguentiniropague aitosati cara tera otsibacanete tsitsi.

⁴⁵ Aisati aroca ontaquimi piguiti ora te onganinate pijocajiro ora picantagueti quimingari. Pobetsiquiro pisëre aisatime ongantima pitotirome piguiti pijoquerome. Caninataque pine paguitinirobi cara Jonogaguitequë, arota quero piátacaguiro pitirooti piguiti Sharincabeniquë

⁴⁶ cara te ingame oguentiniropague aitosati cara te otsibacanete tsitsi.

⁴⁷ Aisatica ontaquimi piroqui ora te onganinate pijocajiro ora quimingari. Pobetsiquiro pisëre aisatime ongantima páguirome pijoquerome piroqui. Caninataque pijáte paoquinirobi cara Jonogaguitequë, querota piátacaguiro pitirooti piroqui cara Sharincabeniquë

⁴⁸ cara te ingame oguentiniropague aitosati cara te otsibacanete tsitsi.

⁴⁹ Antagaisati matsiguenga iratsipiríaque yaca quibatsica. Ora atsipiriagantsipague ongatsitëri quemisantatsiri onganquimaro pibega tsitsi, carari aisa oganinatëri osigaro onganinataganëro patiari ora ibatsa cara itaquineri Tosorintsi.

⁵⁰ Ocaninati patiari, carari omeganëmaca ora cochotacaguiro, ¿Pairo aguipigapairone ora cochotacaguiro? Aisati obirojegui pingantimaro patiari; aroca págacaninatobaganëma, pintiomo-

tobaguima caninasati, pinguengasëretima
 caninasati, aro pinguemisantacagaigueri
 basinipague matsiguenga. Caninataque
 piniacaniatobaganëma págacaniatobaganëma,
 pintiomotobaganëina, piganiataguetiri ira
 basinipague.

10

Iáque Jesus antatinta Joriránquë.

(Mt 19.1-2)

¹ Aique iáiguë Jesus aisati irogomere, yare-
 taigapa Joreaquë, imontiaiganacaro ora nija ji-
 tacha Jorirán. Aique yapatobiritaigacari tojai mat-
 siguenga. Cara yameta Jesus, yogometaguëri.

Jesus yogometocoqueri ira joquërone iina.

(Mt 19.3-12; Ir 16.18)

² Iátasitaiguëri Jesus bariseopague; icogabeca
 iraniantëmari irantacaquerime te onganinate.
 Yosamitaigapëri:

—¿Caninataqueco irojocajiro iina sërari?

³ Yotabitaigabaqueri Jesus:

—¿Pairo isanguenataiguëmi Moisés jirai?

⁴ Icantaiguëri bariseopague:

—Icanque Moisés: “Aroca iritsirishanëmaro iina
 sërari, irisanguenatënero, ingomantëro: ‘Nocogu-
 ini nojocajimi; pijátaje’. Imëro sanguenari ora
 irojogantëmaro”.

⁵ Icantaiguëri Jesus:

—Icanque Moisés cara caninataque pijocajiro
 pijina tenta pinganinataigue.

⁶ Carari cara pobetsiquengani antagaisati jirai,
 Tosorintsi yobetsiquëri ira sërari aisati tsinane.

⁷ Iroro cara iráquero iina sërari, irojocanëri iriri aisati iniro,

⁸ irágasantëro iina, intimacaquero casiriconiati. Coshoni iroquimaro, ingantajima paniro ibatsa. Jirai inabitaca sërari aisati iina; yamai coshoni irogobaguima, intimaiguë inganguima paniro. Iniaiguëri Tosorintsi irianti paniro ibatsa. Ipani-rootitaiguëri.

⁹ Iroro te onganinataguëte irojocobagajima. Que-rootisati ijocaguëri basini matsiguenga.

¹⁰ Cara ipigapa Jesus pongotsiquë, yosamitaiguëri irogomere paio icanti.

¹¹ Icantaiguëri Jesus:

—Aintaca sërari irojocajiro iina, iráque basini tsinane, aroque yaguimintacaro iinasonori ora ijoque jirai. Te inguemisantiro ora icanti Tosorintsi: “Quero pintantopitiro pijinasonori”.

¹² Aitosati pairoraca joquërine ojime páguëri basini sërari aisati paguimintari ojimesonori, te onguemisantiri Tosorintsi ora icanque: “Quero pintantopitiri pijimesonori”.

Jesus yoguëneri janequipague ibaco.

(Mt 19.13-15; Ir 18.15-17)

¹³ Aique yamapëngani itiomijani janequipague cara Jesusiquë, icogaiguë cara irogaguetineri ibaco Jesus iguitopaguequë janequi iromanocotiri ingábintseri Tosorintsi. Carari iniaigabaqueri irogomere, imetaigacari Ira Jesus, icantaigabaqueri, isintsitsaqueri:

—Quero paseriguëri Atingomi.

¹⁴ Iniaiguëri Jesus iguisatsataiguëri irogomere, icantaiguëri:

—Quero picantiri. Nocogui iribocasitaigapëna janequijegui. Igóiguë iroso intingomintina. Antagaisati icantaigari ibega ica intiomoquina cara itingomibintanti Tosorintsi.

¹⁵ Aisonori nangantaiguëmi: icaegui janequi in-intaiguë intingomintimari Tosorintsi; pairiraca te intingomintimari aisati ingantima ibega janequi, quero yareta cara igáanti Tosorintsi.

¹⁶ Aique yágobëri janequipague Jesus itsomaguetobëri panirootipague, yoguëneri ibaco iguitoquë yamanocotaiguëri:

—Iromitocotimita caninasati Tosorintsi, ingábintsemita.

Jesos icamanaaqueri ira sërari casintasantachari.

(Mt 19.16-26; Ir 18.18-27)

¹⁷ Cara iáque Jesus abatsiquë, isigopa poro sërari yobaticagueritotaguëpari Jesus, yosamitëri:

—Caninari Ogomeantatsiri, ¿Pairo nanganque arota përosati nantimanë canta Jonogaguitequë?

¹⁸ Yotabitanëri Jesus:

—¿Pairo picantobiquina Naro caninari? Paniro ini caninari, Irianti Tosorintsi.

¹⁹ Aroque pigóque ora icanque Tosorintsi cara isanguenaquero Moisés:

Quero póganti; quero pintantopitiro pijina; quero picositanti; quero pitsoiguëgotaguetari ira basinipague; quero pamatobianti; pinguemisantiri piri aisati piniro, quero pipëgatsatëmatari.

²⁰ Icanqueri sërari:

—Ogometinari, aroque naquemisanquero omagaro oca cara ninë janequi irooti yamai.

21 Inetsëri Jesus, ininqueri, icanqueri:

—Panibati. Pinintica iraniacaninatimi Tosorintsi, atsi pijáte, pomimantiro antagaisati ora pasinta, pomaguetiri coguitiaguetchari omagaro opënataga; aique imëmi Tosorintsi ora caninaro cara Jonogaguitequë. Cara pomimantëroca antagaisati atsi piguiatapëna Naro.

22 Cara iquemobëro oca icanqueri Jesus yogasëretasantanaca, icomëtanaca iboroquë irironta casintaguetasantacha, aique iátaji tenta iraninte imimantiro ora yasinta.

23 Inetsagueiguëri irogomere Jesus, icantaiguëri:

—¡Opomirintsitomocari casintaguetachari iriátë canta itingomibintanti Tosorintsi!

24 Iquenganeintasantanacaro irogomere ora icanque Jesus. Carari yogatsitairo Jesus icanque:

—Obirojegui aisa picantari notomijegui; opomirintsitomocari inganaque pairiraca cara iragáantanequë Tosorintsi.

25 Nanganquemi: opomirintsitomocari cameyo ingue otiomijaniquë omoro quitsapi, carari omomirintsitomotasantëmari casintachari iriátë cara igáanti Tosorintsi.

26 Ocari oca iquemaigabaque irogomere, iquenganeintasantanaca, yosaminatobaganaca:

—¿Aisonorico? ¿Pairo inganquima matsiguenga iragabisaicoontima?

27 Jesus inetsaiguëri irogomerejegui, icantaiguëri:

—Quero icantiro matsiguenga, quero paniro yogabisaicota, carari Irianti Tosorintsi inganquero antagaisati. Te omomirintsitomotimari Iriro.

*Ora imaigneri Tosorintsi iraegui aguiatëri Jesus.
(Mt 19.27-30; Ir 18.28-30)*

²⁸ Aique icanqueri Peroro:

—Ogometinari, pinguengaiguena narogui. Nojocaiganaquero omagaro nasintaigabita, noguataiganaquemi.

²⁹ Yotabitanëri Jesus:

—Aisonori nangantaiguëmi: quero pitsipiriario. Aroca pintingomintina Naro aisati pijocaiganaquero pobango, pirementipague, pitsiropague, piniro, piri, pitomipague, pitoganepague, pijocanëro aronta pinintaiguina Naro piguiatëna aisati piquenguitsatironta nanibare, aro ingantocobentaiguëmi Tosorintsi.

³⁰ Aroca pijocopitënaros arosata cara piguiatëna, imaignëmi Tosorintsi tojai. Págobëro yamai tojai basini pongotsi, tojai pirenti, tojai pitsiro, tojai piniro, pitomi, aisati pitogane; aisati inguisaneintëntimi basiniati matsiguenga. Carari pintiomoquina përosati canta Jonogaguitequë.

³¹ Ainta yamai tojai itingomipague yaca quibatsica, carari quero igáanti cara Jonogaguitequë cara panironta Atingomi. Aintasati tojai itsipiriaiguë yaca yamai, imaintaiguëri matsiguenga carari aiquenta imaignëri Atingomi iromitocoiguëri cara igáanti Iriro. Icarantë yamai carari aiquenta irobataje.

Aisati yogatsitairi icomantairi irogomere Jesus cara ingamaque.

(Mt 20.17-19; Ir 18.31-34)

³² Iáiganaque Jesus aisati irogomere aiqnero Jerosarénquë, itongaiganaque.

Jesos ibataiguëri irogomere abatsiquë. Yoguiataiganaqueri, iquenganeintasantaiganaca, aisati itsorogaiganaque. Jesos yáganëri irogomere casiriconiati, icomantaiguëri atiraca inganquengani Jerosarénquë. Icanqueri:

³³ —Pinguemina. Yamai ajáiguë Jerosarénquë. Naro paniacha Jonogaguetequë, nomatsiguen-gatapë cara niboguë yaca quibatsica. Iroro cantënguicha cara Jerosarénquë irágaiguëna itingomipague saseriroti aisati iraegui ogameantiro isanguenare Moisés. Ingantaiguëri ira Iromasati: “Páguiri Jesos, póguri tenta ingomeite”.

³⁴ Irisërontaiguëna, iripasataiguëna, irio-bataiguëna, aique irógaiguëna. Carari ongaraque maba cataguiteri nanganiatanae aisati.

Santiago aisati Joan cogatsi irobate.

(Mt 20.20-28)

³⁵ Aique yotsitipari Jesos Santiago aisati ireinti Joan, pítirooti itomi Sebereo, icantaiguëri:

—Ogometinari, nanintaiguini pingantina ora nomanaquimira.

³⁶ Yotabitanëri Jesos:

—¿Pairo pininti nanganquemi?

³⁷ Icantaguëri:

—Aiquenta cara pigáantanequë, nocoguini pinintacaguina poro naro nosobiaque pobacosonoriqë, ica igueca irisobiaque pomatepacoquë.

³⁸ Yotabitaiganaqueri Jesos:

—Te pigóigue ora pamanaquena. Aiquenta nat-sipiriaque tojai. ¿Teco pintsorogue ca pitsipiri-aiguë obiro?

³⁹ Icantaiguëri pitirooti:

—Te nontsorogue, nangantaiguëro naro nat-sipiriobiquimi.

Icanqueri Jesus:

—Jee, aisonori, aiquenta pigasëretocoquina aisati pitsipiriobiquina.

⁴⁰ Carari quero Naro pimirone cara pisobicomovina aiquenta. Paniro Pabati përine pairiraca tsipaquinane Naro cara nagántë.

⁴¹ Iquemaiguëri basini irogomere icarati 10. Iguisaneintobiqueri ira Santiago aisati Joan, aro-quentá icogabeca pitirooti iraguibatimame.

⁴² Aro icaimaiguëri irogomerejegui, icantaiguëri:

—Pigóiguë ira itingomipague basiniati matsiguenga cagari jorío yametaiga imerataigari imatsiguenga. Aisati ira obatacagantatsiri imerataigari imatsiguenga.

⁴³ Carari quero aisati picantaigari ibegaiga iriro. Pinintaiguëca piguibatima obiati, pomitocotaigueri pomatsiguenga pingábintsaguetaigueri, quero pimeratari.

⁴⁴ Pinintica piguibatima, pomitocotaigueri pomatsiguenga pairoraca ininti. Pingantimari ibega iromeraro.

⁴⁵ Nopaniaca Jonogaguítequë, nomatsiguen-gatapë arota nomitocotaigueri matsiguenga, quero nimeratari. Aisati nipocasi que nangamobitaiguëri antagaisati matsiguenga

arota iragabisaicotajiri Tosorintsi cara
inguemisantaiguëna Naro.

Jesos yogaguibegajiri Baritimeo, comarajari.
(Mt 20.29-34; Ir 18.35-43)

⁴⁶ Aro yaretaigaca Jericóquë Jesos aisati
irogomere. Cara yogagaiganaca, yoguiataigana-
queri abatsiquë tojai matsiguenga. Ainta
isobiaque onamiquë abatsi Baritimeo comarajari,
itomi Timeo. Ira Baritimeo yamananteanti
quirequi imëri matsiguenga.

⁴⁷ Cara iquemobëri Jesos Nasaresati, icaimanë
icanque:

—¡Jesos, imatsiguenga David, pingan-
taneintëgotina!

⁴⁸ Aro iguisatsataigabitacari ira botoitaigacha,
icantaiguëri:

—¡Pomairete!

Aiquero iátanëtigue icaimasantanë:

—¡Natingomi, pingantaneintëgotina Obironta
imatsiguenga David!

⁴⁹ Yaratingopë Jesos, icaimagantëri, icanque:

—Pingaimiri.

Aro icaimaiguëri, icantaiguëri:

—Pinganintanë, pingabiritima, icaimimini.

⁵⁰ Aro ijocanëro iguitsagare icabiritanaca
omanapague ipocasiqueri Jesos.

⁵¹ Icabëri Jesos:

—¿Pairo picogui nanganquemi?

Yotabitanëri comarajari icampëri:

—Natingomi, nanintini piniacagajina.

⁵² Icanqueri Jesos:

—Atsi pijátaje. Piniaje yamaica. Aroquenta piquemisanquina cara nagobiajiro piniaje, aro naniacagajimi nogabisaicotajimi.

Aito cara iniaanai, yoguiatèri Jesus.

11

Icanaque Jesus Jerosarénquë.

(Mt 21.1-11; Ir 19.28-40; Jn 12.12-19)

¹ Cara pënibaque iraretaiguëma Jerosarénquë, aitisati pite poeboro otiomijani jitacha Betajajé aisati Betania aronisatiquë oguitoja jitacha Olibos, igáqueri Jesus pite irogomere

² icanqueri:

—Pobate, pijáigue catingasati poeboroquë irooti cara piniaqueri itiomijani boro itsatocotaga. Iriro teraiquerai ingueicotigani. Pintaicotiri, pomapëri yaca.

³ Aintaca matsiguenga irosomitobëmica: “¿Pairo pitsaicobiritiri boro?” aro pinganëri: “Icoguirini Atingomi; aiquenta iraguipigairi”.

⁴ Aique iáiguë irogomere, iniaigapëri boro itsatocotaga omoroquë pongotsi yaratianque cara págaboquiobaga abatsi. Itsaicotanëri.

⁵ Ainta inasegui matsiguenga, yosamitaigabaqueri:

—¿Pairo pitsaicobiritanëri itiomijani boro?

⁶ Aro yotabitanëri pitirooti ora icabëri naaraiquerai Jesus. Aro inintacagaiguëri matsiguenga iráganëri.

⁷ Icatsatanëneri Jesus, yoguëneri iguit-sagarepague imiticaraqüë boro itiomijani aro iqueicotanacari Jesus.

⁸ Ainta inaigasegui tojai matsiguenga yoguiaiguëri Ira Jesus. Yogaguetaiguëneri iguitsagarepague cara abatsiquë arota iragaticanëro boro. Aisati yogaguetaiguëneri otiomijani otsego anchato aisa icanta icantaigabaquineri itingomi.

⁹ Ibataiganaqueri tojai matsiguenga aisati yogu-
iataiganaqueri tojai. Icaimaiganaque:

—Tojai icaninatasanti Tosorintsi. Ainta Agabi-
saicoontatsiri. Igáqueri Tosorintsi aroquenta inia-
caninatëri Irirro, icábintsëri.

¹⁰ Irianti imatsiguenga David atingomi jirai. Intsome antingomintobëmari, intsome aniacani-
natobëri Irirai Atingomi. Caninari Tosorintsi jono-
quënintaberi.

¹¹ Cara yarepaa Jesus Jerosarénquë, icanaque
oquibequë pongotsi irasi Tosorintsi cara yapato-
taiga joríojegui, inetsagueque antagaisati. Aro-
quenta ochapinitanë isotocanai iáque Betaniaquë.
Itsibataigacari irogomere caratatsi ¹².

*Jesos icogabecaro ojito igueraquë, te ine ojito.
(Mt 21.18-19)*

¹² Cara oquëtaguetanai ipigaigaa Jesus aisati
irogomere aiquero Jerosarénquë. Itaseguë Jesus
cara abatsiquë.

¹³ Iniopëro panguirintsi jitacha iguera. Inatsi
tojai osi. Iátasiquero, icogabeca ojito, carari te
ine. Patiro pinë osi terainta omoncaratima ora
oguitsonta iguera.

¹⁴ Icanquero Jesus:

—Yamai quero pinai basini ojito oca igueraca.
Quero otsimagani ojito aisati.

Iquemaiguëri irogomere.

Jesos ijocaigapairi ira pimantaguetatsiri cara oquibequë pongotsi irasi Tosorintsi.

(Mt 21.12-17; Ir 19.45-48; Jn 2.13-22)

¹⁵ Cara yaretaigapaa Jerosarénquë, icanaji Jesos oquibequë ibango Tosorintsi, iniaigapëri iraegui pimantaguetatsiri aisati manantatsiri, iguisaigapëri, ijocaiguëri sotoquë. Aisati ijoqueri ira campiatobagari iguireguite aisati ira pimanqueri paroma; yotëatapëri imesanepague aisati irisobigomentopague.

¹⁶ Te iranintacaguiri matsiguenga iráguë paio-raca oquibequë pongotsi.

¹⁷ Aique Jesos yogometaguëri ira matsiguenga:
—Ocanti Sanguenari:

Icanque Tosorintsi: “Nocogasanti iromanocotaiguena omagaro matsiguengapague yaca nobangoca”.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

¹⁸ Iquemocoqueri Jesos itingomipague saseriroti aisati ira ogomeantiro isanguenare Moisés. Aro icogabeca iróquerime carari itsorogaiguërinta matsiguenga aroquenta iquenganeintasantaigacari Jesos ora irogomeantane.

¹⁹ Cara otsitinengatanë, iáiguë sotoquë Jerosarénquë Jesos aisati irogomere.

Iniaiguëro iguera, pisiguiricanë.

(Mt 21.20-22)

²⁰ Oquëtaguetanai, cara ipigaigaa, iniaigapairo iguera ora icanë chopiqueraí aroque ocamaque irooti opariquë.

²¹ Iquianquero Peroro, icanqueri:

—Ogometinari, ¡Pinetsero! Ora panguirintsi aroque pisiguiricanë ora picanë chopi, “Quero otsimagani ojito aisati oca igueraca”.

²² Yotabitaiganaqueri Jesus:

—Pinguemisantiri Tosorintsi, pisëretimari.

²³ Aisonori nangantasantaiguëmi: aroca pinganqueri Pabati: “Pigaganënaró oca oguitojaca, pi-joquiro cara angaarequë”, aisati queroca pitsoinguiri, piguiaqueri inganquero, aro inganquimiro.

²⁴ Iroro nangantaguëquemi: pairoraca pomanaqueri Tosorintsi pinguemisantiri, piguiaqueri imëmiro, aro inganquimiro.

²⁵ Cara pomancoquerica Tosorintsi, piguibate pingábintseri pomatsiguenga, pijocajineri ora icantaguetomotimi te onganinate, arota Ira Piri jonoquëñintaberi irojocajimiro ora picantaguetomotiri obiro te ongomeite.

²⁶ Carari queroca pijocajineri pomatsiguenga ora icanquimi te onganinate, querootisati ijocajimiro Piri ora picantagueti obiro cagaro caninatatsi.

*Yosamitëri Jesus jorójegui: “¿Pairi agáquemi?”
(Mt 21.23-27; Ir 20.1-8)*

²⁷ Yaretaigapaa Jerosarénquë. Yanëisigui Jesus oquibequë pongotsi irasi Tosorintsi cara yapatotaiga jorójegui. Aro ipocasitaigapëri itingomiegui saseriroti aisati ira ogomeantiro isanguenare Moisés aisati antiasipari.

²⁸ Yosamitaigapëri:

—¿Pairi agáquemi cara pijocaiguëri pimantatsiri?
¿Pairi oguëmi cara pijica itingomi?

²⁹ Yotabitaiganaqueri Jesus:

—Aisati naro, patiro nosamitaiguëmi; aroca potabitaiguëna, aisati nongomantaiguëmi pairi agáquena Naro.

³⁰ ¿Pairi agáqueri Joan cara ibaotisataiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga? Pingomantina.

³¹ Icantobagaiganaca jorío:

—Anganqueri: “Igóqueri Tosorintsi”, aro ingancái: “¿Pairo te pinguemisantobitaiguëri Joan?”

³² Carari aroca anganqueri: “Igóqueri matsiguenga”, aro inguisaigacái omatsiguengapague ijitaiguënta cara igáqueri Joan Tosorintsi ingomantaguete.

³³ Aro yotabitaiguëri:

—Teni nogóigue pairi agáqueri.

Icantaiguëri Jesus:

—Aisati Naro, quero nocomantimi pairiraca agáquina nangantaguete ocapague piniaiguë.

12

Jesus icomantëgotëri ira omisantiro obasi.

(Mt 21.33-46; Ir 20.9-19)

¹ Aisati iparintaca Jesus iquenguitsataiguëri matsiguenga quingabaguirentsiquë. Yosiacagantineri icantaiguëri:

—Ainta sërari ipanguiaque obasi, itantotëro, iquiaque omoro cara iragaticaguitëro oguitso aisati ora irágantëmaro oja. Aisati yobetsiquëro pongotsi oquibiantsa jonoquë ora

iranetsantimaro. Aique yogaiquëri omisantineri irobasite. Iquengaigaca cara onguitsotanëca, ira omisantineri iráquero aganguisati oba, aganguisati imagantëneri casintaro. Aique iáque jaanta intimaque cosamani.

² Cara omoncaraca cara oracanë oguitso oba, igátabecari iromeraro icanqueri: “Pijáte pingampëri ira omisantino nobasite imagantaiguenaro nasiati”.

³ Carari ira omisantiro yágaigabaqueri ipasataigabaqueri. Yoguiquëri, te imëmatobëri oba.

⁴ Aique igátabecari basini iromeraro. Iriro aisati ipasataigabaqueri iguitoquë, icabegobëri.

⁵ Aisati igátabecari basini ira yogamagaigabaque. Ira casintaro igátabecari basini iromeraro tojai. Ainta ipasataigabaque; ainta basini yogamagaigabaque.

⁶ Panibani itomi, ira inintasanti. “Irirojengari irianicaninataigabaque”, icanque. Aro igáqueri itomi.

⁷ Irari omisantineri irobasite iniaigabaqueri itomi, inibatobaca: “Irironta itomi casintaro. Cara ingamaquenica iriri, iriroquerai áganairone obasi. Intsome ógaigabaqueri, águero obasi asintaiguenaromaro eiroquerai”.

⁸ Aro yágaigabaqueri, yogamagaigabaqueri, ijo-caiguëro igamaga sotoquë obasiquë.

⁹ ¿Pairo piquengaiga? Cara iribocapë ira casintaro obasi, ¿Pairo inganqueri iragui catsimari ira omisantaiguineri? Cara iribocapë, irágaigapëri ira catsimari omisantatsiri, iripoguiriaigapëri. Aique irogaiguëri basini omisantinerine irobasite, irianti caninari.

10 ¿Teco pinibataiguero ora Sanguenari? Ocanti: Jirai itsoingaiguëro mopë ira obetsiquirori mopëpongo, ijoquero tenta irogóiguero cara icoiguëro Tosorintsi iroonti otingomi mopë, otingomi pongotsi, cantaca otingomipoa. Carari yágairo ora mopë itingomiantaaro pongotsi.

11 Icaninabenquero Atingomi, iniacaninatëro, icantacagajiri matsiguenga cara irogajiro otingomi mopë. Aisati naquenganeintasantëro narogui.

12 Aro igóiguë itingomi saseriroti aisati ira ogomeantiro Sanguenari aisati antiasipari cara Jesus iquenguitsatocotaiguiri irirojegui. Iguisaneintaigabitacari icogaigabitaca irácagantërime, carari yomitsorogaiguëri matsiguenga igóiguënta matsiguenga cara aisonori Jesus icomantëgotëri Tosorintsi. Aique iátaji joríojegui, ijocaiganaqueri Ira Jesus.

Yogomequeri bariseo Jesus cara inganquineri itingomi ora icoicoqueri.

(Mt 22.15-22; Ir 20.20-26)

13 Ira itingomiegui igátaiguëri Jesusiquë bariseopague aisati iratirite Eroris. Icogabeca iramasitacaguirime irinibare arota inguiseri itingomi cobeingari.

14 Iátasitaiguëri Jesus, icampëri:

—Ogometinari, nigóiguë aisonori pogomeantiro Irinibare Tosorintsi, aisati poniagantiro catin-gasati atiraca ongantima aretaiguëmari Tosor-intsi. Te pintsoroguiru pairiraca. Yamai pingo-mantina ora piquianca Obiro: ¿Caninataque omëri

Sésar aguireguite? ¿Teco onganinate omagantëri cobeingari cara Iromaquë?

¹⁵ Igóque Jesus cara icogaigabitaca irantacaguirime ora te ongomeite. Yosamitaigabaqueri:

—¿Pairo picogobiti pomatobitina? ¿Pairo picogobiti pamasitacaguinaro nanibare? Te pinganinate. Poniaguinari quirequi ira pipënabiantari ogobeingarite Iromasati.

¹⁶ Aro yamaigapëneri quirequi ira jitacha tenario. Yosamitëri Jesus:

—¿Pairi casintaro oca irosiacagomentoca? ¿Pairi ijita sanguenatëgotënguicha yaca tenarioica, iroonti iripajiro?

Yotabitaiganaqueri:

—Iroonti irasi Sésar nogobeingarite.

¹⁷ Aro icantaiguëri Jesus:

—Aro pomaigueri Sésar iraisati, pingantineri ora icocagaiguëmi, pinguemisantiri. Aisati pinguemisantiri Tosorintsi pomaigueri ora iraisati ora icocagaiguëmi Iriro.

Iquemaiguëri, iquenganeintasantaiganaca.

Aisonori inganiantanae igamaga.

(Mt 22.23-33; Ir 20.27-40)

¹⁸ Aisati iátasitaiguëri Jesus saroseopague, ira ijitasitaiga cara quero icabiritaja igamaga, quero icaniantanai. Icantaigapëri:

¹⁹ —Ogomeantatsiri, jirai isanguenataiguëna Moisés:

Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguëmari itomi ireintitomaco.

²⁰ Jirai ainta sërari aisati ireinti icarati 6. Ira obatatsi yágabita iina, carari te irine itomi. Aique icamaque iriro.

²¹⁻²² Aro iina yágairo ireinti. Aisati icamaque iriro, te irine itomi. Aisati icantaiga ireintiegui yágaigabitaaro tsinane, icamaiguë omagaro, te irinématique itomi. Aique ocamaque tsinane aisati, aro ocaraque.

²³ Cara ingabiritaiguëma, ¿Pairi ágairone? Pinetse, ijinantaigabitaro antagaisati ireintiegui.

²⁴ Yotabitaiganaqueri Jesus:

—Tojai pamatobitaiga obiatiegui tenta pigóiguero Sanguenari, teatisati pigóiguero itasorintsite Tosorintsi.

²⁵ Aisonori, cara angabiritajima, antimaigae, quero águero ajina. Antagaisati cabiritachane ingantaiguëmari ibega ironomire Tosorintsi: quero yágai iina.

²⁶ Ingabiritaiguëma omagaro camaigatsiri. ¿Teco pinibatiro ora icanti Tosorintsi jirai, isanguenaquero Moisés? Tosorintsi icanqueri Moisés cara anchatoquë pamasigatsi:

Naro Tosorintsi. Iquemisantina Abaram. Iquemisantina Isac. Iquemisantina Jacob.

²⁷ Te ingante: “Iquemisantabequina”. Aroca iquemisanqueri Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi. Obirojegui yamai picomëtacani.

Icomantëgotëro Jesus ora obatatsi ora icocaque Tosorintsi.

(Mt 22.34-40; Ir 10.25-28)

²⁸ Ainta poro ogomeantiro isanguenare Moisés, iquemaiguëri bariseo aisati saroseo cara yosamitaigapëri Ira Jesus. Aisati iquemaqueri Jesus cara yotabitanëri caninasati. Aro yosamitëri Jesus iriro:

—Aiti tojai pogometaguequina Sanguenari. ¿Pairo obatatsi ora anguemisanque?

²⁹ Yotabitanëri Jesus:

—Iroro oca obatatsi:

Isirael, pinguemaigue obirojegui. Pinguemisantiri Atingomi Irianti Pitosorintsite. Iriro paniro Irirosori tenta irine basini Tosorintsi.

³⁰ Pinintasantiri Tosorintsi Atingomi, pomasëretasantimari obiati, përosati pinguengeri, pinguemisantiantiri, pingantineri antagaisati ora icocaquimi Ira casintimi.

³¹ Ora otsibatara ocantaro pibega basini, ocanti:

Pinintiri pitimanamitane pibega cara pininta obiati.

Oca pite iragáantane Tosorintsi iroro obataigatsi. Te ine basini obataiguerone.

³² Ira ogomeantiro Sanguenari icanqueri Jesus:

—Jee, aisonori, Ogomeantatsiri, ora picanque. Paniro ini Tosorintsi; teni irine basini.

³³ Aisati caninataque anintasantiri, omasëretimari eati, përosati anguengeri, anguemisantiri, angantineri omagaro ora icocací. Aisati ocanta caninataque anintiri atimanamitane ibega cara aninta eati. Aisonori oca iroro obatatsi, pabisëro cara omëri Tosorintsi oisha. Te ingogasante Iriro ataquineri oisha.

³⁴ Jesus iquemaqueri, igótocoqueri ira ogomeantiro Sanguenari cara yotabitanë caninasati, icanqueri:

—Pënibaque pintangomintimari Tosorintsi, pënibaque intingomibintëmi obiro.

Aique itsorogaiguëri matsiguenga; te aiquero irosomitaigairi aisati Ira Jesus.

Quirisito imatsiguenga David.

(Mt 22.41-46; 23.1-36; Ir 20.41-47)

³⁵ Cara yogomeantasegui Jesus oquibequë pongotsi cara yapatotaiga joríojegui, yosamitaiguëri:

—¿Pairo icantobitaiguë ira ogomeantiro isanguenare Moisés cara “Ira Quirisito imatsiguengasonori David”?

³⁶ Jirai Isère Tosorintsi osanguenatacaqueri ira David. Isanguenaque nega:

Ira Tosorintsi icanqueri Natingomi: “Pisobigue yaca nobacosonora. Pintsibatina yaca nagáantomentoquëca irooti cara nagabeiri antagaisati ira quisaiguëmi, irajitaiguëmi Itingomi”.

³⁷ Aisati David ijitiri Itingomi. ¿Ati ingantima David intingomintobitimari imatsiguengasonori ira boquënguistsine aiuenta? Iriroca Itingomi David, ¿Pairo te pijitobitaiguëri Pitingomi obirojegli aisati?

Iquemaigabaqueri tojai matsiguenga botoibiritagari Jesus, icaninabentaigabaqueri.

³⁸ Përosati yogometaguëri matsiguenga Jesus:

—Pigamaiguemari iraegui ogomeantiro isanguenare Moisés. Quero picantaigari ibega iriro. Icogasantaguë iriro iranëitagueantëmaro

imanchaqui caninarosonori aisati oquibeintsa. Aisati icogasantaiguë iriáiguë cara opimantagani pairoraca arota iraniacaninataiguëri matsiguenga irobetsatobëmari.

³⁹ Aisati icogaiguë iragasobicaiguëri caninaroquë sobigomentotsi cara yapatotaiga jorío. Cara irapatoitima imatsiguenga irapaiguë, icogaiguë irisobicaigue aganguisati intsibataiguëmari itingomipague.

⁴⁰ Aisati yágabitsaquero obango ogamaimentaga iroontita cosamani yamanocotasitari Tosorintsi arota iraniacaninataiguëri matsiguenga. Carari nongomantaiguëmi ira cantatsi negaca iratsipiri-asantaiguë irabisaiguëri basini matsiguenga, tojai ingasítigatëri Tosorintsi.

Ora tsinane opëri Tosorintsi omagaro oguireguite.

(Ir 21.1-4)

⁴¹ Ainta Jesus isobiaque oquibequë pongotsi irasi Tosorintsi. Inetsaiguëri matsiguenga cara yomingaiguëri iguireguite yogantaririquë quirequi ira ipiri Tosorintsi. Ainta casintaguetachari yomingaiguëri tojai quirequi.

⁴² Aisati iniobëro tsinane ogamaimentaga pomianqueri pite itiomijani iguitso quirequi ira te iripënatima.

⁴³ Icaimaiguëri irogomere Jesus, icantaiguëri:

—Nangantaiguëmi, aisonori ora ogamaimentaga te aisa ongantaiguemari basini ira paiguëri Tosorintsi iguireguite. Arosataanti quirequi opëri iroro, carari Tosorintsi iniacaninatëro pabisaiguëri basini.

⁴⁴ Iraegui basini paiguëri Tosorintsi arosata ira inomotaiguiri, ainta tojai yoganontaiga. Carari cara opabacari Tosorintsi aisati opëri antagaisati pasinta inomotiro, teni irinaje basini omanantantajima operi.

13

Icanque Jesus ogomeriguëtëngani ibango Tosorintsi.

(Mt 24.1-2; Ir 21.5-6)

¹ Cara isotocanë Jesus oquibequë pongotsi cara yapatoitaiga jorójegui, poro irogomere icanqueri:

—Ogometinari, pinetsero mopëpague ora yobet-sicantaro pongotsipague. ¡Oquibeguinte, caninaro!

² Yotabitanëri Jesus:

—¿Piniaigabitacaró ora pongotsipague? Aisonori nongomantëmi oca: aikuenta irogomeriguëtaiguëro antagaisati. Quero pini yaca pite mopë otsibatobagaa.

Ati ongantima irogomeriguëtëro ibango Tosorintsi.

(Mt 24.3; Ir 21.7)

³ Aique iáque Jesus isobigopë oguitojaquë jitcha Olibos. Catingasati pinë ibango Tosorintsi. Aro casiriconiati yosamitaiguëri itsibasati irogomere: Peroro aisati Santiago aisati Joan aisati Antiris:

⁴ —Pingomantaiguena: ¿Ati ongantima cara irogomeriguëtëro orapague pongotsi? ¿Pairo ogótacaquinane cara omoncaraquima antagaisati oca picantaiguënaca?

Icomantaiguëri Jesus: “Aiquenta iratsipiriaiguë matsiguengajegui”.

(Mt 24.4-8; Ir 21.8-11)

⁵ Icantaiguëri Jesus:

—Pigamaiguema arota quero yamato-bitai gapëmi pairiraca.

⁶ Iribocai guë tojai matsiguenga ingantaigapëmi: “Naro Quirisito”. Iromatobitai gapëri tojai matsiguenga.

⁷ Pinguemocotaiguëro omanátobagachari; ingantaiguëmi: “Yomanátobacani canta jaanta”. Ira basini irojocai guëri itingomipague irogaiguëri irirai. Quero iquengaiganaja matsiguengajegui, carari quero pitsorogaigui. Aiquenta onganquima tojai inguisabacaquima, carari quero querai omoncarata omagaro ora nacantaiganaquemi.

⁸ Aiquenta inguisaiganaqueri basiniati matsiguenga, inguisëgotobaganëma irógobaquima. Aisati tojai osebataguetanëma quibatsiquë. Aitosati iritasegaiguë tojaisonoru matsiguenga omagaroguitequë. Antagaisati oca iroonti omarintanëma, iroro cantënguicha quero querai yobomirintsitasantiri matsiguengajegui. Aiquenta coraque agabenisonori atsipiriagantsi.

Tojai inguisaguetaiguëri ira quemisantatsiri.

(Mt 10.19-22; 24.9-14; Ir 21.12-19)

⁹ Përosati icomantëri Jesus:

—Pigamaiguema obirojegui. Cara irogóiguë matsiguenga piquemisantaiguina irágaiganaquemi cara yapatotaiga, iripasataiguëmi. Aisati irágaiganaquemi catingasatiquë itingomipague

aisati cobeingaripague. Pitsipiriaquero
 oca aroquenta piquemisantaigëna Naro.
 Pingomantaguetiri iraegui quisaiguëmi.
 Pingomantëgotina.

¹⁰ Nocogui cara queroquerai pabisi omagaro
 oca atsipiriagantsica, ingomantëgotaguequero
 Caninaro Nibarintsi antagaisati matsiguenga-
 paguequë ati ongantima nagabisaicotajiri cara
 inguemisanquina.

¹¹ Cara irágaiganaquemica cara yapatotaiga itin-
 gomipague, quero pitsorogui, quero piquenga:
 “¿Pairoraca nanganqueri?” Ogósëretacaquemi Isère
 Tosorintsi ora pinganque, onibataquemi.

¹² Aiquenta ira sërari irácagantëri ireinti,
 irócagantëri. Aisati irácagantëri ira itomi.
 Ira janequipague irácagantëri ira casintari
 irócagantëri.

¹³ Piquemisantaiguënanta, inguisaiguëmi
 matsiguengajegui. Carari nagabisaicotajiri
 antagaisati ira abequerone, ira quemisan-
 taiganaquina përosati.

*Icanque Jesus: “Aisati irobomirintsitaiguëri
 Joreasati. Aisati tojai iratsipiriaiguë antagaisati
 timaiganaquenguitsine”.*

(Mt 24.15-28; Ir 17.22-24; 21.20-24)

¹⁴ Aisati icomantë Jesus:

—Jirai isanguenaque comantantatsiri jitacha
 Daniel:

Aiquenta ingapë cara ibangoquë Tosorintsi ira
 quimingarisonori cantaguetasantatsi ora
 te ongomeite, iraguimingatëro antagaisati.

Pigóiguëro Sanguenari. Cara piniaiguërica ira nocomantëgoti yamaica inganaque ibangoquë Tosorintsi cara quero iqui pairiraca, aroca pitimi Joreaquë pisigaiganaquima otisipaguequë.

¹⁵ Aintabica obiro sotoquë pobangoquë, quero picapanaanti tso magui págapanaantiro ora pasinta; iroontita pisigasantanëma.

¹⁶ Aroca pinë pitoganequë, quero pipigasitapanaantaro basini piguitsagare.

¹⁷ Tojai otsipiriaiganaquero tsinane ora pëñibatatsira aisati ora tsotagatsi ojaniquite queronta pisigasantanaca.

¹⁸ Pomanocotiri Tosorintsi arota quero pisigaiga cataguitერიquë omarigantetetica angani.

¹⁹ Aitosati icanë Jesus:

—Aique tojai iratsipiriasantaiguë matsiguenga. Iratsipiriasanoiguë abisërone ora itsipiriaiguë matsiguenga jiraisonori irooti yamaica, aisati abisërone omagaro inanënguitsine aiquenta.

²⁰ Aroca ongosamanitanëme cara iratsipiriasanoiguë, opoguriaguëri omagaro matsiguenga ingamaque, carari Tosorintsi ingábintsaiguëri antagaisati quemisanqueri iraegui icoiguë, arota quero ocosamaniti atsipiriagantsi.

²¹ Aintaca poro cantatsi: “Iriro Quirisito Ica”, quero piquemisantiri. Aisati inganquemica: “Intsome canta Quirisitoquë”, quero poguiatiri.

²² Coraque iribocapë tojai matobiantatsiri ingampëmi: “Naro Quirisito”. Aisati iribocapë basini inganque: “Naro comantëgotëmirine Tosorintsi”. Tojai iritosongantë, ingoque iromatobitaiguëri tojai matsiguenga, carari quero

yamatobitiri ira quemisantasantatsi ira icoiguë
Tosorintsi.

²³ ¡Pigamaiguema! Aroque nocomantaiguëmi
atiraca ongantima aiquenta queroquerai omon-
carata.

*Atiraca ongantima cara iribocapae Jesus
aiquenta.*

(Mt 24.29-31; Ir 21.25-28)

²⁴ Aisati icomantaiguëri irogomere Jesus:

—Cara abisanaqueca oca atsipiriagantsica,
aique intsitinique paba, aitosati quero
yobariaguitetanaï manchacori,

²⁵ imariaguëpë jonogasati, aisati osebatanëma
omagaro jonoquë.

²⁶ Aique iraniaigabaquena Naro, Naati nopa-
niaca jirai Jonogaguitequë nomatsiguengatapë,
nopogopë mingoriquë, nongobeingatasanotapë
nosangueguitetasanotapë, nantingomibintasan-
taiguëri omagaro, nagabeiri antagaisati.

²⁷ Aisati nagátaigapëri nonamireegui
irapatotaiguëri antagaisati quemisantaiguëna
iraegui igoigane Tosorintsi atiraca itimagueti
quibatsiquë.

Yosiacagantaiguëneri iguera Jesus.

(Mt 24.32-35; Ir 21.29-33)

²⁸ Aisati yoniagaiguëri irogomere Jesus:

—Yamai nosiacagantaiguëmiro anchato jitacha
iguera: pinguengasantiro. Cara iroraini otsego,
ositanae osi, aro pigóiguë pënibaque osariganaje.

²⁹ Aisa ocanta, cara piniaigabaquero oca nacan-
taiguëmica yamai, pigóiguë pënibaque orequima
cataguiteriquë cara nopogopae.

³⁰ Nangantasantaiguëmiro oca: queroquerai icamaigui joríojegui tsoengatsiri queroquerai omoncarata oca nocomantaiguëmica.

³¹ Omeganëma omagaro ora inatsi jonoquë aisati omeganëma oca quibatsica, carari quero opega nasi nanibare. Omoncaraquima omagaro ora nacantaiguëmi.

Te ogótengani atiraca ongantima cara iribocapae Jesus.

(Mt 24.36-51; Ir 12.41-48)

³² Aisati icanque Jesus:

—Te irogóte pairiraca atiraca ongantima nopocaje Naro. Te irogóigue ironomireegui Tosorintsi. Nipoque, nomatsiguengatapë carari teatisati nogóte Naro. Paniro igótiro Pabati.

³³ Pigamematasha, aisati piguiaiguena tenta pigóigue atiraguiteca cara nopigapaima.

³⁴ Nosiacarí sërari játatsi canta jaanta. Queroquerai iáti, ingaimëri antagaisati iromeraro, ingomantaguetanëri paniropague pairoraca inganquineri. Aisati iroganëri omisantineri omoro íbango. Inganqueri: “Pigamema, pinetsero”.

³⁵ Arotasha pinaigue obirojegui nogomere tenta pigóigue atiraca ongantima iraretajima casintaro pongotsi. Te pigóigue iribocapaeca chopiniquë, queroca aganguitequë, queroca coniamaniaquë cara ingaimanë tiapa sërari, queroca naramaniquë.

³⁶ Pigamabentimatasha cara iriguito irarepaima casintaro, caquitatsibi iraniopaimi.

³⁷ Ora yamai nanganquimira aitosati nanganqueri antagaisati: “Pigamematasha”.

14

*Icoque itingomipague jorío irácagantëri Ira Jesus.
(Mt 26.1-5; Ir 22.1-2; Jn 11.45-53)*

¹ Aro pitenibati cataguiteri orequima jiesita jitacha Pásicoa cara yapaiguiro joríojegui ora pan te ine piponganta, aisati iquengaigaca cara isotocaiguë Ejípitoquë jiraisonori. Aro yapatotaigaca itingomipague saseriroti aisati ira ogomeantiro isanguenare Moisés icogaigabitaca iromatobitaigueri Jesus arota iráqueri aisati iróguiri.

² Icantobagaigaca irirojegui:

—Quero águiri jiesitaquë. Iriro iniacaninataigui matsiguenga. Aroca águëri inguisaigacái eiroegui.

*Oshaguëantacari casangajengaro Jesus Betani-
asato.
(Mt 26.6-13; Jn 12.1-8)*

³ Aique yogaganaca Jesus canta Betaniaquë. Cara, ainta Iriro ibangoquë Simón ira iribatsasetabitaga jirai. Yapasigui Jesus cara pipocasipëri tsinane. Pamëgotasitapëri asaiti casangajengaro jitacha náriro ora tojai pipënata. Ora pinanta pobetsicagani mopë sibiraro jitacha aribásitoro. Pisataicoquero, oshaguëguitontapari Jesus iguitoquë.

⁴ Aintasati basini matsiguenga igu-
isëgotaiganacaro casangajengaro. Icantobaganaca:

—¿Pairo paparaabiriquero casangajengaro?

⁵ Caninataqueme omimantërome casangajen-
garo águëri me tojai quirequi 300 tenario omëri me
tojai ira coguitiacha omitocotaiguëri me.

Iguisaneintaiganaquero tsinane.

⁶ Icantaiguëri Jesus:

—Ineta iroro. ¿Pairo picantobiquero oca tsinaneca? Patiro ocanquinaro caninaro.

⁷ Përo cara irinaque obirojeguiquë ira coguitachari te irine iguireguita; cara pinintica pomitocotaiguëri iriro. Carari quero nini Naro përosati.

⁸ Ocanquinaro caninasati. Oshaguëantobënaro queroquerai iteina.

⁹ Aisonori nangantaiguëmi: aiquenta pinguenagueque omagaroquë quibatsi, pinguenguitsatomotaguetaiguëri matsiguenga Caninaro Nibarintsi. Aisati pingomantëgotiro oca tsinaneca arota irogótocotiro matsiguengajegui.

Joras iquianca irácagantëri Jesus.

(Mt 26.14-16; Ir 22.3-6)

¹⁰ Aique iáque paniro irogomere Jesus, ijita Joras Cariotisati. Iátasitaiguëri itingomipague saseriroti, inibatagaigapëri cara irácagantëri Jesus.

¹¹ Iquemaigabaqueri saseriroti, icaninataiganaque iquengaigaca imëri Joras quirequi. Aique ipigapaa Joras, inetsasantëri Jesus arota irogóontëmari atiraca ongantima cara irácagantëri.

Yobetsiquineri Jesus irogomere cara icarantacaro yapë.

(Mt 26.17-19; Ir 22.7-13)

¹² Pareca Pásicoa cara yametaiga joríojegui yapaigui pan te ingonaguero ora piponganta, aisati cara yóguiri oboina oisha aisa icanta cara icantaigaca jorío jiraisonori Ejípitoquë. Yosamitaiguëri Jesus irogomere:

—Natingomi, ¿Nega pininti nobetsiquëmiro cara popë Pásicoaquë?

13 Jesus igáqueri pite irogomere:

—Atsi pijáte poeboroquë. Cara pitonguibotobëmarica sërari iromëgotapë nija chomoquë, piguiatanëri.

14 Cara ingapë iriro, pinganqueri casintaro pongotsi: “Icanque Ogometaigninari: ‘Cara pobangoquë, ¿Nega pini cara nopaignüë Pásicoa Naro aisati nogomerejegui?’ ”

15 Ironijagaignüëmiro oquibe coarito jonoquë; aito pobetsiquëro perintsi asi Pásicoa.

16 Aique iáiguë pite cara poeboroquë, iniaigapëri sërari aisa ocanca omagaro cara icantaiguëri Jesus. Aro yobetsicaiguëro Pásicoa.

Jesus icomantëgotëri ira ágagantërine.

(Mt 26.20-25; Ir 22.21-23; Jn 13.18-30)

17 Cara otsitiniguitetanë, yaretaigapa Jesus aisati irogomere.

18 Cara yapaigasegui mesaquë, icantaiguëri Jesus:

—Aisonori nangantaiguëmi, ainta paniro yapëgotëna yaca ira ágagantënane.

19 Aro yogasëretaigaca antagaisati, paniropague yosamitëri:

—Natingomi, ¿Naroco ágagantëmine?

20 Icantaiguëri Jesus:

—Irianti paniro obirojegui picarati 12. Irianti pëcosiguina cara napë noberatotequë.

21 Nopaniaca Naro Jonogaguitequë, nomatsiguengatapë yaca quibatsica. Jirai isanguenatocoquina Sanguenariquë, aroque

nomoncaraquero omagaro. Irari atsipirias-
antërone ira ágagantënane, ¡Caninataqueme querome
ini iriro! ¡Querome itsipireiro!

*Yogomeantë Jesus irapapinintobiqueri
quemisantatsiri aisati irógobitaiguëmari.*

(Mt 26.26-29; Ir 22.14-20; 1 Co 11.23-26)

²² Cara yapaigasegui, Jesus yáguë pan, icarasi-
aqueri Tosorintsi, itibatsaaguequero, yotsaten-
gaiguëri irogomerejegui. Icantaiguëri:

—Jeroca pan osigaro nobatsa. Popaiguero. ¿Teco
nangamobitaiguemi?

²³ Aique yáguë irógomento, icarasiaqueri Tosor-
intsi, ipaguitaiguëri. Antagaisati yógaigacaro.

²⁴ Icantaiguëri:

—Iroso osigaro naraa, ora naraatobitanëneri
omagaro matsiguenga cara nangamobitaiguëri.
Yamai naraa ocanti irorai Nibarintsi;
iroso ingábintsantaiguëmari Tosorintsi. Cara
irabentaiguëna, Tosorintsi irojocajineri
matsiguenga ora icantaguëti te onganinate, quero
iquengaineri aitosati. Nacantaiguëmi yamai arota
pigóigue atiraca ongantima iragabisaicotajiri
Tosorintsi antagaisati quemisanquinane.

²⁵ Yamaica quero nógaaro oja oba aisati irooti
cara nantsibataiguëmi cara iragáantanequë Pabati.
Cara igáantë Irroso omagaro omasiniatitanë. Aique
nóguëmaro irorai aisati obirojegui.

*Icantaiguëri irogomere Jesus: “Yamai
pijocaiganaquina”.*

(Mt 26.30-35; Ir 22.31-38; Jn 13.36-38)

²⁶ Aroque yapaiguë. Aique icántataiguë Jesus aisati irogomere, íaiguë cara oguitojaquë jitacha Olibos.

²⁷ Icantaiguëri irogomere Jesus:

—Yamai pijocaiganaquina pisigaguetanëma, cara ocanti Sanguenari:

Nóguëri ira omisantirine oisha, aro irisi-gaiganaquima iroishate, inguenagueque porocague.

²⁸ Carari nanganiatanae, nobataiguëmi canta Garireaquë.

²⁹ Iriro cantënguicha Peroro icanqueri:

—Aroca irojocanëmi antagaisati basini icaegui, quero nojoquimi naro.

³⁰ Yotabitanëri Jesus:

—Aisonori nongomantëmi, Peroro. Yamaica tsi-tinirica queroquerai icaimanai tiapa sërari, on-garaque maba pinganque: “Teni nogótiri Ira Jesus”.

³¹ Aisati icanatasantë Peroro:

—Aroca nantsibatëmi nangamobiquemi, quero nacanti: “Teni nogótiri Ira Jesus”.

Aisa icantaiguë antagaisati irogomere.

Jesus yamanaqueri Iriri cara panguirintsisiquë jitacha Jetsemaní.

(Mt 26.36-46; Ir 22.39-46)

³² Aique íaiguë yaretaigaca Jetsemaníquë. Jesus icantaigapëri irogomere:

—Pisobicaigue yaca; najáque Naro cara, no-manocoqueri Pabati.

³³ Aro maba yáganë casiriconiati: Peroro aisati Santiago aisati Joan. Iparintaca Jesus tojai yogasëretasantaca aisati iquenganeintasantaca.

34 Icanqueri:

—Tojai nogasëretasantaca agabenisonori. Pënibaque nangamaque. Pisobicaigue yaca, pingaguite.

³⁵⁻³⁶ Aique yogaganaca cara querora, yaquito-mopa quibatsiquë. Yamanocopëri Iriri:

—Apa, Pabati, Obiro pinganque omagaro; caninataque pigabisainaro ora bocatsi; teni naninte natsipirie, carari quero nacantiro ora nocogabeca Naro, iroonti nanganque ora picocaquina Obiro.

³⁷ Aique Jesus ipigapaa irogomerequë. Iniopairi isamaigasegui. Yosamitëri ira Peroro:

—Simón, ¿Pairo pisamabirique? ¿Teco pabebintsatiro pobotsiquine, te pabetiro pingaguitëmate arosata?

³⁸ Pingaguite, pomaniri Tosorintsi arota iromi-tocotaiguemi quero picantaguetiro ora te on-gomeite. Picogabeta pingantirome ora noco-caquemira, carari te pingantiro.

³⁹ Aisati iátaji Jesus. Yamanocotajiri Iriri. Irooti-sati yogatsitairi ora icanqueri naaraiquerai.

⁴⁰ Ipigapaa aisati iniopairi irogomere aitosati isamaigasegui, tojainta ipotsiquitasantë. Te irogóiguë irotopitanairi.

⁴¹ Aisati iátaji yamanopai maba. Aro ipiganaja Jesus, icantaiguëri irogomere:

—¿Somaigatsibico? Atsi pisamaigue yamai. Jirai nopaniaca Jonogaguitequë nomatsiguengat-apë. Carari aroque omoncaraca yamai cara irácagantëna ira cagari caninataigatsi.

⁴² Pingabiritaiguema, intsome ajáte. Coraguitaque ira ágagantënane.

Yáguëngani Jesus.

(Mt 26.47-56; Ir 22.47-53; Jn 18.2-11)

⁴³ Cara inibatasegui Jesus, yarepa Joras ira yogometabeta Jesus. Icarataigapëri tojai matsiguenga. Yamaigapë isabirite aisati anchaqui. Aroque igátaiguëri itingomipague saseriroti aisati ira ogomeantiro isanguenare Moisés aisati anti-asiparipague.

⁴⁴ Aroque icomantaiguëri Joras icanque:

—Ira nasarapëma ora pigóontanëmari Iriro Jesus. Páganëri.

⁴⁵ Aique iátasipëri Jesus Joras, yasarapari, icanque:

—¿Aintabi, Ogometinari?

⁴⁶ Aique ipocasitaigapëri antagaisati ira itsibataigapa Joras, yágaiganaqueri Ira Jesus.

⁴⁷ Aro paniro irogomere yáguë isabirite, itogumitatëri iromeraro itingomi saseriroti.

⁴⁸ Aro icantaiguëri Jesus:

—¿Pairo pamasibiriquinero pisabirite aisati anchaqui págantanënaró? ¿Pijitaiguëco Naro cosirintsi?

⁴⁹ Tojai piniaigabitina cara nogometaguimi cara ibangoquë Tosorintsi, te págaiguena carari aroquenta omoncaraca ora ocomantëgotina Sanguenari.

⁵⁰ Aique ijocaiganaqueri Jesus antagaisati irogomere, isigaguetaiganaca.

⁵¹ Ainta poro oboina sërari yoguiatanëri Jesus. Te inguitsagatema, patiro icanaquero tocoya. Yágaigabitacari iriro matsiguenga

⁵² carari ijocanëro tocoya, isigaganatanaca saacanari.

Yágaiganaqueri Jesus catingasatiquë itingomipague joríojegui icarati 71.

(Mt 26.57-68; Ir 22.54-65; Jn 18.12-14, 19-24)

⁵³ Aique yágaiganaqueri Ira Jesus ibangoquë itingomisonori saseriroti cara yapatobiritaigacari basini itingomipague saseriroti aisati antiasipari aisati ira ogameantiro ora isanguenare Moisés.

⁵⁴ Yoguiataiguëri Peroro icarantanë. Icapë tantotsiquë tomagui itsibataigacari sorarójegui cara yotataiguë tsitsiquë.

⁵⁵ Aro ira itingomipague saseriroti, aisati antiasipari, aisati omagaro itingomipague jorío icarati 71 icogaigabitaca matsiguenga ingomantëgotëri Jesus ora te onganinate arota irogaigueri.

⁵⁶ Ainta tojai itsoiguëgotaignacari Jesus carari te inguenguema.

⁵⁷ Ainta basini tsoiguëgotantachari icantaiguë:

⁵⁸ —Caní jirai naquemaiguëri naroegui cara icanë Jesus: “Nogomeriguetairo oca ibangoca Tosorintsi ora yobetsicaiguë matsiguenga. Ongaraque maba cataguiteri, nangabiritajiro basini irorai ora te irobetsiquiro matsiguenga”.

⁵⁹ Carari teatisati onguenguema irinibare ira comantëgotaigneri.

⁶⁰ Aro icabiritanaca itingomi saserirotipague, yosamitëri Ira Jesus:

—¿Pairo te potapibiritiri? ¿Pairo ojita oca icantocotaiguëmica?

⁶¹ Përo cara imairetopitëri Jesus, te irotopitëmatiri. Aisati yosamitairi itingomi saseriroti:

—¿Obiroco Quirisito Itomi Tosorintsi caninarisonoriguinte?

⁶² Icanque Jesus:

—Jee, Naro. Nopaniaca Jonogaguitequë, nomatsiguengatapë. Aiquenta piniaigaina nosobigopë ibacosonoriquë Tosorintsi sintsirisonoriguinte, aisati piniajina cara nopoque mingoriquë, nopigapaima yaca quibatsica.

⁶³ Aito cara iguisanaca itingomi saseriroti itisaraanëro imanchaqui, icanque:

—Piquemaigabaqueri. ¿Pairo ongogobique basini comantëgotërine?

⁶⁴ Icantocotaguetasitari Tosorintsi. ¿Pairo piquengaiga obirojegui? ¿Pairo anganqueri?

Yotabitaiguëri joríojegui; iquengaigaca antagaisati:

—Caninataque ingamaque.

⁶⁵ Aique ijobaboroqueri iboroquë, ibasioqui-queri iroquiquë incho tangaborotëri. Icantaiguëri:

—Jaa, pingomantina. ¿Pari capojëmi?

Aisati iromeraroequi itingomi saseriroti incho tangaborotëri.

Icanque Peroro: “Teni nogótiri Jesus”.

(Mt 26.69-75; Ir 22.54-62; Jn 18.15-18, 25-27)

⁶⁶ Aintaquerai isobiaque Peroro saaguiteroquë. Pipoque tsinane ironomire itingomi saseriroti.

⁶⁷ Oniopëri cara yotasigui tsitsiquë. Onetsasantëri ocanqueri:

—Aisati obiro aguiatiri Jesus, Ira Nasaresati.

⁶⁸ Carari itsoiganaca Peroro:

—¡Teni nogótiri! ¡Teni nanguemimi pairoraca picantina!

Aro iátabeca Peroro cara icabitapa. Aito cara icaimanè tiapa sërari.

⁶⁹ Iroroquerai tsinane onetsiri Peroro aisati. Ocantaiguëri iraegui inaigasegatsi:

—Ica sërarica aguiatëri Jesus aisati irogomere.

⁷⁰ Yotabitanai Peroro:

—¡Teni nogótiri!

Caraca arosata, ira inaigasegatsi icantaiguëri ira Peroro:

—Aisonori obiro tsipataigari irogomere Jesus obironta Garireasati; pinibatinta picantaigari ibegaiga Garireasati.

⁷¹ Icantasanti Peroro:

—Te sonori nogótiri sërari ira picantocoquina. Igóque Tosorintsi aisonori nacanquemi. Quero roca ninibatimi catingasati, nocogui ingasitígatina Tosorintsi.

⁷² Aito cara yogatsitanai icaimanai tiapa sërari. Aro iquianquero Peroro cara icomantëri Jesus: “Queroquerai icaimanai tiapa sërari, maba pinganque: “Teni nogótiri Jesus’ ”. Cara iquengairo ora icanqueri Jesus, iragasantanaca Peroro.

15

*Yágaiganaqueri Jesus catingasatiquë Pirato.
(Mt 27.1-26; Ir 22.66-23.25; Jn 18.28-40)*

¹ Oquëtaguetamananaque, yapatotaigaca itingomiegui saseriroti aisati antiasiparipague aisati iraegui ogomeantiro isanguenare Moisés. Aisati yapatotaigaca basini obatacagantatsiri icarati 71. Iquengaigaca, yoguëshotaiguëri Ira

Jesos, yágaiganaqueri cara Piratoquë, ipaigapëri Pirato ira cobeingari.

²Yosamitobëri Jesos Pirato:

—¿Obiroco Itingomi joríojegui?

Yotabitanëri Jesos:

—Jee. Naro aisonori ora picanque.

³Icantocotagueticari Jesos itingomiegui saseriroti, icantaiguë:

—Tojai icantagueque ora te ongomeite. Te inganinate Iriro.

⁴Aisati yosamitairi Pirato icanqueri Ira Jesos:

—¿Pairo te potabitëmatobitiri? Tojai icomantëgotaiguëmi cara picantaguetiro te ongomeite.

⁵Carari te irotopitëmatiri Jesos irooti cara iquenganeintasantanacari Pirato.

⁶Aro antagaisati osarini omoncaraca jiesita cara iquengaigaca joríojegui jiraisonori cara yabisobenqueri ironomire Tosorintsi cara Ejípitoquë. Cara jiesitaquë yameta Pirato iromisotocajiri paniro ira yomingui iromingamentoquë, ira icoigaiguë jorío.

⁷Ainta iromingane ijita Barabás. Yomianqueri irironta ógueri aisati icantaiguëri imatsiguenga: “Intsome ojocajiri Iromasati ogobeingarite”.

⁸Aro yapatotaigaca joríojegui, icocagaiguëri ira Pirato:

—Yamaica nocogaiguini pingantinaro ora pameta: pomisotocajiri paniro iromingaga.

⁹Yotabitaigabaqueri Pirato yosamitaiguëri:

—¿Picogaiguico cara nomisotocajimiri Ira Itingomi joríojegui?

10 Icanque negaca Pirato aroquenta igóque cara iguisaneintasicari Jesus itingomiegui saseriroti tenta iraninte inguemisantiri Jesus matsiguenga.

11 Carari itingomiegui saseriroti icantacagaiguëri joríojegui:

—Nocogaiguini pomisotogajiri ira Barabás.

12 Aique yosamitaiguëri Pirato:

—¿Pairo nanganqueri Ira Jesus Ira pijitaiguë Itin-gomi joríojegui?

13 Icantaiguëri catsigue joríojegui:

—¡Popëicotiri corosiquë!

14 Yotabitaiguëri Pirato:

—¿Pairo icanque quimingari ora nopëicobiriqueri?

Icaimaiganaque jorío catsigue:

—¡Popëicotiri!

15 Icogasanti Pirato iraganinataiguëri matsiguenga. Aro yomisotocajiri Barabás, ipaiguëri joríojegui. Aisati igáqueri soraro iripasataiguëri Jesus aisati iribëquëgotëri.

Isërontaigacari Jesus soraropague itsipiriaca-queri.

(Mt 27.27-31; Jn 19.1-3)

16 Aique yágaiganaqueri Ira Jesus cara ibangoquë cobeingari, tomagui, ora jitacha peretorio. Yapa-totaiguëri omagaro basini irapisorarote.

17 Aro icaagaigabaqueri Jesus manchaguinsi quiraaquisaamagori. Aisati yobetsiquëneri imat-seiro iroonti totsei, imatseiqueri.

18 Aique isërontaigacari, yobet-satomemegaigacari:

—¡Obiro Natingomi! ¡Intimeta Itingomi joríojegui!

19 Yágaiguë anchaqui ipasatantaigacari iguitoquë, ijobatopiantaiguëri, yobaticaguëri-totomemegasitacari, itingomintomemegacari.

20 Cara itsongaiguë icabíntsátaiguëri isërontaigacari, yágabitsaqueri manchaguíntsi quiraaquisaamagori, icaagobairi iraisati imanchaqui.

Ipëicotaiguëri Jesus cara corosiquë.

(Mt 27.32-44; Ir 23.26-43; Jn 19.16-27)

Aique yágaiganaqueri cara iribëquëcoiguëri.

21 Itonguibocari sërari Sirenesati, ijita Simón. Iriro iriri Arijantoro aisati Irojo. Ipaniaca parigoti, iáque Jerosarénquë. Imeratobacari soraro, igáqueri:

—Páganëneri igorosite.

Aro yáganëneri irooti cara

22 yaretaigaca Górogotaquë ora ocanti osigaro iguito igamaga.

23 Aro ipabitacari Jesus oja oba ogonoataga casangajengaro jitacha mira, carari te iróguimaro Jesus.

24 Aro ira soraropague ipëicotaiguëri Jesus cara corosiquë, aique imaguimpibintëqueri imanchaqui Jesus ipabacaguecaro yotsatiancaro.

25 Terai irionogatasante paba cara ipëicoqueri.

26 Isanguenaquero pairoraca ipëicobiriqueri. Ocanque: “Ica Iriro Itingomi jorójegui”.

27 Aisati ipëicoqueri pite cosirinti itsibatacari Jesus. Ainta paniro ibacosonoriquë Jesus, basini imatepacoquë.

28 Aro omoncaraca Sanguenari ora ocanti negaca:

Itsibatacari ira cantaguetiro te onganinate.

²⁹ Ainta abisanaqueri abatsiquè iniopëri Jesus, icabegaiguëri, ipoteguitotaigapa,

³⁰ icantaiguëri:

—Obiro ogomeriguëtirone ibango Tosorintsi, aisati ongaraque maba cataguiteri, pobetsicairo. Atsi yamai pigabisaicotajima Obiati. Cagarimica matobiantatsiri, piguëtajima corosiquè.

³¹ Aisati isërontaigacari itingomiegui saseriroti aisati iraegui ogomeantiro isanguenare Moisés icantobaca:

—Yogabisaicotaiguëri imatsiguenga carari te iragabisaicotima Iriati.

³² Iriroca Itingomi joríojegui, Agabisaicoontatsiri, iraguëtajimata Iriati corosiquè. Nanetsaiguëri, aro nanguemisantaiguëri.

Aisa icanca ira cosirinti itsibatancari ipëicoqueri icantocotaguetasicari Ira Jesus, icabegaiguëri aisati.

Cara Icamaque Jesus.

(Mt 27.45-56; Ir 23.44-49; Jn 19.28-37)

³³ Cara catinga paba otsitiniguitetanë antagaisati quibatsi irooti cara inëmatanë paba ochapinitanë.

³⁴ Cara ochapinitanë icaibatanë Jesus.

—Eroi, Eroi, ¿Irama sabacatani?

Ora ocanti: “Pabati, Notosorintsite, ¿Pairo pijo-cobitanëna?”

³⁵ Ainta matsiguenga cara, iquemaiguëri icantaiguë:

—Pinguemobëri. Icaimëri Erías comantantatsiri.

³⁶ Aro isiganaca poro, yáguë ichomicantaro, yoaquero obaaquë cochoari. Yoguëneri chocopiquë itimagonaguitanaca ipabitacari Jesus, icanque:

—Irinita. Atsi anetseri aroca iribocasitapëri Erías iraguëpëri iragabisaicoqueri.

³⁷ Aro icaimasantanë Jesus, irooti icamantaca.

³⁸ Cara icamaque Jesus, aito cara otisaraanaca aganguisati ora yotigantaro ibango Tosorintsi. Iroonti oquibepiriga tera yoguëro arota quero iqui pairiraca. Oparintaca jonoquë, otisaraaca irooti osobi.

³⁹ Aro ira capitán inetsaseguiri Jesus, ati icanta cara icaibatane aisati icamaque. Icanque:

—Aisonori Ica sërarica Iriro Itomi Tosorintsi.

⁴⁰ Aintasati cantiqueronta tsinanepague onetsaiguëri Jesus. Ainta María Magararasato, aitosati basini María iniro Santiago carantatsi aisati iniro José, aisati Saromé.

⁴¹ Ocapague tsinane poguiataiguëri Ira Jesus cara Garireaquë, opaiguëri iraperi, tojai omitocoiguëri. Aisati ainta basini tsinanepague aguiataigapëri irooti Jerosarénquë.

Itiaiguëri igamaga Jesus omoroquë.

(Mt 27.57-61; Ir 23.50-56; Jn 19.38-42)

⁴² Aroque ochapitanë. Iroero cataguitari cara yobetsicaiguë jiesita queroquerai pareta sábaro cara imagoriaigui.

⁴³ Aro ipocasiqueri Pirato poro Arimateasati jitacha José. Iriro icarataigui basini obatacagantatsiri icarati 71 cara yapatotaigaca. Iriro iniacaninataiguë matsiguenga aisati yoguiaquero

iragáantane Tosorintsi cara intingomibintaiguëri antagaisati matsiguenga. Te intsoroguiri ira cobeingari; ipocasipëri yamanopëri:

—Camaque Jesus. Nocogui pinintacaguina náganëri igamaga nomianqueri omoroquë.

⁴⁴ Imabocaca Pirato cara aroque icamaque Jesus. Icaimagantëri igapitante soraro, yosamitobëri:

—¿Aisonori camaque Jesus?

⁴⁵ Cara icomantëri capitán Pirato cara aisonori icamaque, ipëri José igamaga Jesus.

⁴⁶ Aique iáque José yamanantëro tocoya caninaro irorai, yoguëpëri igamaga Jesus, iponatan-cari tocoya, yomianqueri omoroquë ora yomoroquera jirai cara mopëquë, ititiguëro mopë yasitocoontobacari.

⁴⁷ Cara yomianqueri igamaga Jesus tsomagui onetsaiguëri María Magararasato aisati basini María iniro José.

16

Cara icabiritanaa Jesus icaniatanai.

(Mt 28.1-10; Ir 24.1-12; Jn 20.1-10)

¹ Pabisanaque cataguiteri comagoriantague aique piáiguë maba tsinane, María Magararasato, María iniro Santiago aisati Saromé. Piáiguë pamanantaiguë casangajengaro arota otiritaiguerime Jesus.

² Oquëtaguetanai, iroonti tominco, cara iriraique contepatsi paba, paretaigaca tsinane omoroquë.

³ Posamitobaca:

—¿Pairiraca titigaigacáirone ora mopë yasantacaro omoro?

4 Ocantaiguë negaca oquibeguintenta mopë. Cara onetsaigapëro oquibe mopë, aroque osiringaja.

5 Aro ocaiganaque tso magui omoroquë oniopëri oboina sërari isobigasegui obacosonoriquë. Iquit-sagata manchaguintsi catarisonori. Oniaigapëri oquenganeintasantaigapa otsorogaiganaque.

6 Icantaigabaquero:

—Quero pitsorogaigui. Nigóque pico-gaigabitarini Jesus Nasaresati Ira ipëicoiguë corosiquë. Teni irinaje yaca; aroque icaniatanai, icabiritanaa. Pinetse yaca cara yoguëri.

7 Yamai pijáigue pingomantaigapëri irogomerejegui aisati Peroro: “Aique iriátë Jesus cara Garireaquë cara icantaiguëmi jirai, irobataiganaquemi”.

8 Aique pisotogaiganaji maba tsinane omoroquë, pisigaiganaca. Oquenganeintasantanaca, omogomogoataiganaca otsorogaiganaque. Te ongomantëmatiri pairiraca otsorogasantaiguënta.

*Jesus yoniagapaaro María Magararasato.
(Mt 28.9-10; Jn 20.11-18)*

9 Cara icaniatanai Jesus tomincoquë, irotsita yoniagapaa María Magararasato ora ijoquine ogamagarite icarati 7 jirai cara inantabecaro.

10 Aique piáque ocomantapëri iraegui itsibataiga Jesus cara aroque icabiritaja. Yogasëretaigasega aisati iragaigasega

11 cara ocomantaigabitapari:

—Caniatanai Jesus Atingomi, naniajiri.
Carari te irajitaigabaquero.

Jesos yoniagapaari pite irogomere.

(Ir 24.13-35)

¹² Aique ipasiniatitanë Jesos cara yoniagapaari pite irogomere yanëitaigasegui abatsiquë iáiguë ir-itoganequë.

¹³ Iriro pite ipigaigaa icomantaigapëri ira basini irogomere Jesos. Teatisati irajitaigabaqueri iriro.

Yoniagaigapaari irogomere icarati 11.

(Mt 28.16-20; Ir 24.36-49; Jn 20.19-23)

¹⁴ Aiquenta yoniagaigapaari irogomere icarati 11 cara yapaisigui. Isintsitsataigapëri icanque:

—¿Teco nongomantaiguemi nangabiritajima? ¿Pairo te pijitobitina? Picantaigaca te ine pisëre. ¿Pairo te pijitobitaiguëri ira niaigaina Naro?

¹⁵ Aisati Jesos icantaiguëri irogomere:

—Pijáigue antagaisatiquë quibatsi, pingo-mantëgotaguetinaro omagaro matsiguengajeguiquë oca Caninaroca Nibarintsi cara nacamobiqueri, nacaniatanai.

¹⁶ Pairiraca quemisanquerone oca Caninaroca Nibarintsi aisati imaotisatëma, iragabisaicotajiri Tosorintsi. Ira quero iquemisantiri, Tosorintsi iratsipiriacaqueri iriro Sharincabeniquë.

¹⁷ Ira quemisanquerine, Tosorintsi oniagaiguëmari itasorintsite. Iragántantaiguëmaro nopairo camagaripague. Irinibaquero irorai nibarintsi. Cara iraniaiguëri imatsiguenga irogóontimaro aisonori ora icomantaiguë.

¹⁸ Aisati imogotirica marangue, aroca iratsiquëri, quero icami. Aroca iróguimaro pigantatsiri, querootisati icami. Iroquinerica ibaco janai-tatsiri, aro iragaguibegajiri.

Itsonquero Maricos isanguenare.

(Ir 24.50-53; Irag 1.7-11)

¹⁹ Iroro oca icantaiguëri irogomere Atingomi Jesus, aique iáque jonoquë. Yogainocanaa isobiaque ibacosonoriquë Tosorintsi, itsibatari Iriri cara itingomibintanti.

²⁰ Aique iátagueque irogomere iquenagueque icomantaguetaiguëri antagaisati matsiguenga aisati icanta Atingomi Jesus. Coshoni yogaiguëri Jesus imitocoiguëri cara itasongagueanti arota irogóte matsiguenga cara aisonori ora icomantagueanti.

Aro ocarati ora nasanguenaque. *Maricos*

Irinibare Tosorintsi Ocomantëgotëri
Antigomi Jesoquirisito
New Testament in Nomatsiguenga
(PE:not:Nomatsiguenga)

copyright © 2008 Wycliffe Bible Translators, Inc.

Language: Nomatsiguenga

Translation by: Wycliffe Bible Translators, Inc.

Nomatsiguenga [not], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nomatsiguenga

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

cc057d06-df39-5d12-b492-cf028fb9485d